

بِسْمِ اللَّهِ الرَّحْمَنِ الرَّحِيمِ

ح.م. صدیق

واقف، گؤزهللیک و حقیقت شاعری

فارسجادان ترجمه ائدن:

محمد داوریار

سرشناسه: محمدزاده صدیق، حسین، ۱۳۲۴ -

عنوان قرارداد: واقف شاعر زیبایی و حقیقت: شرح زندگی و اندیشه‌های ملاپناه واقف شاعر آذربایجانی همزمان با آغا محمد خان قاجار. ترکی

عنوان و نام پدیدآور: واقف گؤزه‌للیک و حقیقت شاعری / ح. م. صدیق؛ فارسجادان ترجمه ائدن محمد داوریار. مشخصات نشر: تهران: تکدرخت، ۱۳۸۹. مشخصات ظاهری: ۹۶ص. شابک: ۰-۳۳-۵۵۵۹-۶۰۰-۹۷۸ وضعیت فهرست نویسی: فیپا. یادداشت: ترکی.

موضوع: واقف، ملاپناه، ۱۲۱۲ - ۱۱۳۰ ق. -- نقد و تفسیر

موضوع: شعر ترکی -- ایران -- قرن ۱۲ق. -- تاریخ و نقد

شناسه افزوده: داوریار، محمد، مترجم. رده بندی کنگره: ۳۱۴PL و ۵۷۲۱۸ی ۱۳۸۹

رده بندی دیویی: ۸۹۴/۳۶۱۱ - شماره کتابشناسی ملی: ۸۲۹۴۹۹۱



واقف، گؤزه‌للیک و حقیقت شاعری

تألیف به فارسی از: دکتر حسین محمدزاده صدیق

ترجمه به ترکی از: محمد داوریار

نشانی: خیابان جمهوری، بعد از تقاطع سی‌تیر، جنب کوچه شبیانی، پلاک ۵۴۸، ط همکف

تلفن: ۶۶۷۲۵۵۵۹

مدیر اجرایی: ائلدار محمدزاده صدیق - ناظر چاپ: شهین رهبرنیا

محل نشر: تهران / سال نشر: ۱۳۸۹ / شمارگان: ۲۰۰۰ / نوبت چاپ: اول

شابک: ۰-۳۳-۵۵۵۹-۶۰۰-۹۷۸

واقف، گۆزه‌للیک و حقیقت شاعری ❖ ۵

سخن ناشر

استاد دکتر ح. م. صدیق این کتاب را در سال‌های دانشجویی (۱۳۴۷) در هفته‌نامه‌ی مهد آزادی ویژه‌ی هنر و اجتماع که در تبریز منتشر می‌کردند به صورت پاورقی و به مناسبت جشن دویست و پنجاهمین سال تولد «ملاینا» واقف» - شاعر آذربایجانی - انتشار دادند و سپس در سال ۱۳۵۱ برای اولین بار به صورت کتاب از طرف انتشارات پویا و سپس انتشارات گوتنبرگ در تهران چاپ شد. عنوان این کتاب «واقف، شاعر زیبایی و حقیقت» بود که بارها تجدید چاپ شده است.

آن چه اکنون عرضه می‌شود ترجمه‌ی
ترکی آذربایجانی این کتاب است که
توسط آقای محمد داوریار اردبیلی انجام
پذیرفته است. این مترجم در معادل‌گزینی
اصطلاحات ادبی و علمی و نیز عرضه‌ی
بیان شیوای نویسنده، در زبان ترکی بسیار
موفق است.

مدیر مسئول نشر تکدرخت

سید احسان شکرخدایی

اردیبهشت ۱۳۸۹

فهرست

مقدمه.....	۹
۱- تاریخی و سیاسی زمینه.....	۲۰
۱- ۱. شاه ختایی نین عمل لری.....	۲۰
۲- ۱. نادر شاهین همراى لیگی.....	۲۱
۳- ۱. خان لېقلارېن منشأی.....	۲۳
۴- ۱. آغا محمد خانېن هجومو.....	۲۸
۲- یاشایېشې.....	۳۲
۱- ۲. دؤغومو.....	۳۲
۲- ۲. یاشایېشې.....	۳۲
۳- ۲. سارای دا.....	۳۵
۴- ۲. آغا محمد خان قاجار ایلن قارشې دورما.....	۳۷
۵- ۲. اوّلومو.....	۳۸
۳- ادبی زمینه.....	۴۰
۱- ۳. قاضى برهان الدین.....	۴۱
۲- ۳. عمادالدین نسیمی.....	۴۲
۳- ۳. كشورى تبریزی.....	۴۶
۴- ۳. طفیلی اردییلی.....	۴۷
۵- ۳. حکیم فضولی.....	۴۸

- ۳-۶. علیجان قوسی تبریزی..... ۵۱
- ۳-۷. تاثیر تبریزی..... ۵۲
- ۳-۸. مسیحی تبریزی..... ۵۲
- ۴- واقف و فولکلور..... ۵۴
- ۴-۱. عاشیق ادبیاتی..... ۵۴
- ۴-۲. عاشیق قربانی..... ۵۵
- ۴-۳. عاشیق امانی..... ۵۵
- ۴-۴. عاشیق منطومه‌لری..... ۵۶
- ۴-۵. محمد حسین خان مشتاق..... ۵۹
- ۵- واقفین رئالیزمی و شعرلری نین تصنیفاتې..... ۶۰
- ۶- کئچمیشه کۆکلۆ باغلی لېق..... ۶۳
- ۷- واقفین اجتماعی رئالیزمی و ظالم‌لری تنقید ائتمه‌سی..... ۶۸
- ۸- واقفین مترقی دۆشۆنجه‌سی و خوش گۆرۆملۆلۆگۆ..... ۷۴
- ۹- حقیقی مضمونلو و رئال موضوعلو ادبی- بدیعی یارادېجېلېق..... ۷۵
- ۱۰- یاشایېشا باغلی لېق..... ۷۸
- ۱۱- ادبی تأثیرى..... ۸۰
- ۱-۱۱. ملاولی و دادی..... ۸۰
- ۲-۱۱. قاسم بیگ ذاکر..... ۸۳
- ۳-۱۱. سید ابوالقاسم نباتی..... ۸۴
- ۱۲- واقف- نباتی ادبی جریانی..... ۸۹
- ۱۳- واقف شناسلېغا عائد بعضى منبع‌لر..... ۹۱

مقدمه

شعر و شاعرلیکدن داها چۇخ علمى - اجتماعى نثر ايله مشغول اولماغي سئومگيمه باخمایاراق، عزیز معلمیم، حرمتلى اوستادېم، محکم معنوی دایاغېم، روحانى سؤیکنجهم، سئویملى یورتداشېم، محترم یولداش و قدیم فکرداشېم، فیلولوژییا علملر دکتىرى جناب حسین محمدزاده صدیق دن اجازه آلاق، فارسجا بیر کتابېنېن ترجمه سینی باشا چاتدېردېم. بو ایستگین یعنی فارسجا یازلمېش «واقف، شاعر زیبایى و حقیقت» ادلى کتابین ترجمه سى نین اجازه سى نین سرعتله اوستاد طرفیندن قبولو، قارشېلېقلى آنلاشما و اوستاد - شاگرد محبتینه اساسلانا معنوی - اخلاقى اتفاق دان ایره لى گلیر، بو کتابى من ۱۳۵۳ ده، ۳۶ ایل قاباق، تهران دا اؤخوموشدوم، اما اؤخودوقلارېم یادېمدان چېخمېش ایدی. یئنى اؤخونوشدا تزه - تزه شئى لر اؤگرنیدیم:

۱- اوستاد کلاسیک ادبیاتېن بؤیوک نماینده لرى نین حیات و یارادېجېلېق یولونا حصر ائدیلْمیش کتابلارېندا، ادبیات تا تاریخى جریان کیمی باخېب، بو جریانى دریندن ادراک و ادبى ارشى، تاریخى جریان ايله باغلى تحلیل ائدیبدیر.

۲- اؤنون ادبى معلوماتلا دولو اولان یازلارې، ادبى تعلیمات خزینه سیدیر و اؤخوجوسونا مکمل ادبى بیلیک بخش ائدیر. قدیم کیلر دئْمیشکن، بیاناتِ موزون و کلماتِ پر مضمون لار ایلن، چمنِ معنایه در و جواهر ساچېر، درین

فكرلر و معنالى سۆزلر آشېلايېر، آثار قلميه سى حرکاتِ مدنيت پرورانەيه سبب اولور، اؤخوجوسونو مولانا جلال الدين کیمی ایلک سطرلردن اووسونلايېر، اؤنون سۆز بوخچاسې، حکمت آمیز کلاملار و عبرت آموز عبارتله آشېب- داشېر، سۆزۆ سئچیب ایشلتمکده مثل سیز اوستالېق نمايش ائتديرير، کلاسیک ادبی ارثین، تحقیق، تبلیغ و نشرینه چۆخلو ادبی امک صرف ائدير.

۳- هر بۇيۇک ادبی شخصیتین حیات و یارادېجېلېغې حاققېندا کفایت قدەر معلومات وئير.

۴- ادبی استحصالاتا هر طرفلی حاضرلېق، زنگین معلومات، گئنیش بیلک لرله یاناشاراق، یازېنېن اُسلوبی، مایاسی و مفکورهوی میل لرینی، فورما و مضمونون قارشېلېقې علاقه سى و داخلی وحدتینی گۆزله مکله، علمی دقتله، اؤزۆنه مخصوص موقعی و ادبی - تدقیقی حرکت خطی ایله ایره لیله ییر.

۵- اؤنون ادبی آراشدېرمالارې تاریخی تدقیق لرله باغلې اولدوغو اؤچۆن، روح یۆکسک لیگی، قېزغېن یارادېجېلېق احتراض لارې، تأثیرلی لیگی، هیجان اویادیجی لیگی، ادبی - نظری حرکاتا تکان وئرمه سى، ادبی - بدیعی جریانا دریندن بلدلیگی، ادبیات و صنعتدن اصیل اوستالېقلا باش چېخارتماسى، ادبیات متخصص لیگی و صنعت شناسلېغې ایله معین ائدیلیر.

۶- یازېلارېنېن مضمونون داخلی علاقه سى، منطقى قورولوشو، موضوع لارېن ادبی قیمتی نین تاریخی آردېجېلېق نظریندن دۆزگۆن معین ائدیلمه سى اؤخوجونو حیران ائدير.

۷- بۆتۈن بونلار، ترجمەدە چتىن لىك تورەدیر. مترجمين مسئولیتینی آغیرلاشدۇرۇپ، اۈنون ایشینی مرگب لشدیریر. مترجمی تألیفه برابر (ترجمه تألیفه تن گرهگ) ایش گۇرۇب، علمی- ادبی آختارېشلار سوق ائدیر. بئله لیکله مترجم، ترجمه نین آخېچې، سلیس، آیدېن، روان، دولغون و معنالی اۇلماسی، گۆزەل و آچېق کلام سؤیلمک اۆچۈن، عاغلېندان، جانیندان و بیلیک جوهریندن، مایا قویمالی دیر. گرگین عقلی امکله، آردېچېل دقت و هوسله، ادراکېن گۆجۈ ایله، خلاصه چۇخلو علمی- ادبی آوادانلېقلا (تجهيزات ایله)، ادبی فعال لېقلا ترجمه نی باشاچا تدبیرمالې و تاریخی- ادبی حقیقت لری اۇخوجوسونا تام امانت دارلېقلا افاده ائتمه لیدیر.

بو کتاب اوستادین بیرینجی چاپ اولموش اثری دیر، ۴۱ ایل چاپیندان سۇنرا هله ده تزه لیگی وار. خصوصی شرایط کتابین فارسجا یازلماسی نېن اساس عاملی دیر. انقلاب دان قاباق و سۇنرا دفعه لرله چاپ اۇلوب و حتی تۆرکیه ده خانم پروفیسور دکتر ملیحه انبارچی اۇغلو واسطه سیله تۆرکیه تۆرکجه سینه چئویریلیب. من ظن ائتدیم کی بو کتابی اوستادېن آنا دیلینه نشر ائتدیرمکله اۇز هموطن لریمه بیر خدمت ائتمیش اۇلام.

بو کتاب فارسجادان آذربایجان دیلینه ایلک ترجمه چیلیک فعالیتیم و تجربه م دیر، یقین کی معین قدر قصورلاردان خالی دگیلدیر، اۇدور کی ترجمه نین گله جکده تکمیل لشمه سی اۆچۈن، چۇخ واجب قیمت لی مصلحت و تنقیدی قیدلری یازېب نشریاتېن عنوانېنا گۇندەرجه گی نیزه امید بسله بیر. بری باشدان سیزه اۇز تشکرومۇ بیلدیریرم.

امیدوارىق كى سئويملى اۇخوجولار ترجمەنن مېت مزيترلرئى قىمتلندىرەجك، اسكېكلىكلرى بارەدە اۋز فكرلرئى اچىقلاياقلار. ترجمەنن آيدېن، روان، سليس، آخېجې، اۇخوناقلى و اصلينە قەدر ياخېن و بدىعى اۇلماسې، ترجمەچىلىك قابىلىتى و ترجمە صنعتكارلىغې باخېمېندان باشارې لېغېم حاققېندا اۋز رآىلرئى يازاقلار.

* * *

شفيع افندىنن شاگردى، شاعر، معلم، مکتبدار، دولت خادمى، ديپلومات، عالم، ناظر (وزير)، باش ناظر، انسان سئور، بينالمللچى، معمار و منجم، عاشىق لارېن ان سئويملى اوستادلارېندان، قاراباغ سارايېنن ستونو، دنيوى حس و آرزولارې يۇكسك توتان، ۱۸ ينجى عصر آذربايجان ادبياتېنن گۇركملى نمايندەسى، اورتا عصرلر ادبياتېمېزېن سۇن بۇيۇك كلاسكى، سياسى فعاليتى ايله بدىعى يارادېجېلىغې آراسېنداكى وحدت و علاقه باخېمېندان، كشمكشلى، ضدىتلى بير دۇرۇن گۇزەللىك، سۇگى و شنلىك نغمەكارى، يارادېجېلىغېندا روح يۇكسكلىگى و حياتا باغلى لېغېنا، شعرلرئىنن دىل، اُسلوب، فورما، مضمون و ايدەيا جەتجە اورژىنال اۇلماسينا گۇرە، هجا وزنلريندە يازمېش «قۇشما» و «تجنيسلرئى»، عروض وزنيندە اولان مخمس، غزل، مستزاد و معشرلرئى ايله دقتى جلب ائدەن واقف تخلصو مەدى آغا اۇغلو ملا پناه (۱۷۹۸-۱۷۱۷ م.) حاققېندا باشقا عالملرئىن دئدىكلرئى:

۱- فریدون کۆچرلى:

«آذربايجان تۇركلرئىنن مشهور و مقتدر شاعرى ملاپناه حساب اولونور كى، بيزيم ادبياتېمېزېن بانېسى و مۇسسئى آدلانماغا اۇنون حقى واردېر. ملا پناه اۋز

واقف، گۆزەللىك و حقيقت شاعرى ❖ ۱۳

زمانىدا بىر چۇخ علوم و فنونا واقف اولدوغونا گۆره اۆزۆنه واقف تخلص ائتمىشىدیر.

معاصرلىرى اۆنون درين علمىنى و مالىيىنى مشاهدە ائديب، حاققېندا دئمشلر «هر اۆخويان ملا پناه اولماز.» و بو اصطلاح ايندى ده قفقاز تۆركلىرى آراسېندا مثل مشهوردور. مىلى شاعرلرئيمىزدن، اۆنون كىمى ساده و آچىق لساندا و دىلى ميزين شيوه سينده شعر و غزل يازان آز اولوبدور. معاصرلىرى اونا نظيره يازماغا سعى و تلاش ائديبلر سده، اۆنون كىمى محسّناتلى، گۆزل و آچىق كلام سؤيلمكده عاجز قالب لار. واقف زياده ذوق اهلى اولدوغو اۆچون «گۆزل» مدحينه خىلى مرغوب و نازك شعرلر يازمېش دېركى اۇنلارېن جمله سى قلوبدن نشأت ائدن حسّيّاتدير كى، اۆخويانلارا دخى سرايت ائديب، اۇنلارې شوق و هوسه گتيرير.

ملا پناه آرتېق فصيح، شيرين زبان و حاضر جواب بىر وجود ايميش كى هر قسم مطلبى اۆز مقامېندا مناسب حال سؤيله ر ايميش.»

۲- حميد آراسلى:

«اونودولمايان، تزه- طراوتلى، سحر كار قورولوشلو، دوداقلاردا سسله نن، اۆره ك لره دامان، ديللر ازبرى اولان، نسل لره يادگار قالان شعرلرى، آداما يئنى حيات و قوت بخش ائدير. اۆز ادبى- سياسى فعاليتى ايله خلقه باغلى مترقى شخصيت لردن و قدرتلى صنعتكارلاردان بىرى دير.

آذربايجان شعرى تاريخينه، دۇنۇش نقطه سى ياراداراق، خوش گۆرۇملۇلۇك احوال روحيه سى، حياتى و دۇنيوى گۆزل ليگه پرستش حس لرينى قوت لنديرن، يوكسك ذوق، اينجه حس لر، درين و خوش بين دويغولار شاعرى، عاشېق

شعری میزدن گلن یۆکسک دُنیوی لیک، واقف لیریکاسپندا جهت وئریجی رول اوینایبر.

واقف شعرلرینده شاعرین حیاتا خۇش باخیشپندان دۇغان شاد بیر احوال روحیه و خوش گۆرۆملۆک روحو اساس یئر توتماق دادېر. اۇنون حیاتېن قدرینی بیلیمگه، یاشاییشېن نعمت لیرینی غنیمت سایماغا چاغېران اثرلرینده، حیاتی گۆزللیکلری درین دویوب بۆتۆن بونلاردان حظ آلماغې باجاران اینجه ذوقلو بیر شاعر روحو حاکم دیر.

حیاتېن هر آنېندان، باجاربۇلا استفاده ائدیپ، نشئه ایله عمر سۆرمگى مصلحت بیلیر، اۇنا مخصوص اۇلان روح یۆکسک لیگی بۆتۆن یارادېچیلېغې بویو دوام ائدیر. شعرلرینی ۱۸-۱۹ و ۲۰-ینجی عصرلرده هله آذربایجاندا سوادېن یایېلمادېغې بیر دورده بئله شهر مدنیّتیندن اوزاق، اۆتوراق و کۆچری کندلرده درین محبت له سئویردیلر. واقف شعری وطنین ان اوجقار گوشه لرینده بئله محبت له سسله نیردی.

واقف شعرلری نین بئله عموم خلق محبت قازانېب، ضیالېلار محیطیندن کناردا حافظه لرده یاشاماسېنېن اساس سببى (سرى) بۇیۆک صنعتکارین خلقی لیگینده، حیاتا باغلی لېغېندا و حیات حقیقت لیرینی بۇیۆک بیر محبت له، آیدېن بیر دیل ایله افاده ائده بیلیمک قدرتینده دیر.

بۇیۆک صنعتکار، عینی زماندا گۆرکملی دوست خادمی اۆلموشدور. چۆخ تأسف کی اۇنون سیاسى فعالیتى هله ده اطرافلى اؤگره نیلیب آیدېن لاشدېر بلمامېشدېر. واقفین آدې اوزاق سیبیردن توتموش، قارا دنیز ساحل لیرینه قدهر دوام ائدن گئنیش بیر اراضى ده حرمت له چکیلیر. خلق شاعری صمد وورغون واقفین شرفینه

واقف، گۆزه‌للیک و حقیقت شاعری ❖ ۱۵

بیر سېرا گۆزل شعرلر یازېپ، اؤزۆنۆن شعرلرینی بؤیۆک شاعرین اثرلری اساسېندا ترتیب لندیگینی گۆستریپ، ان یاخشی اثرلریندن اۆلان واقف دراماسېنی اۆنون حیاتېنا حصر ائتمیشدیر.»

۳- علیار صفرلی:

« ۱۷- سنجی عصر آذربایجان ادبیاتېنېن ان گۆرکملی نماینده‌سی، آذربایجان لېلارېن حیاتېنېن ضدیت لرینی، سئوینجینی و کدرینی داها پارلاق شکیلده انعکاس ائتدیرمیشدیر.

واقف اؤزۆنۆ «روز ازلدن عاشیغی کامل سئودا مزاج» و «دنیا عاشیق لارېنېن رسواسی» آدلاندېرمیشدیر. شاعرین قوشمالارېنېن اساس آپارېچی موضوعو محبت دیر.

آذربایجان ادبیات تاریخینده مهم یئر توتان، آدې نظامی، نسیمی، فضولی، میرزه فتحعلی و صابر کیمی صنعتکارلارلا یاناشې چکیلن، قدرتلی سۆز اوستادلارېندان بیرى، ادبیاتېمېزېن معاصر تکامل مرحله‌سی نین «تمل داش لارېنې» قویان لاردان دېر.

فکرلرینی شاعرانه افاده و یازېلې ادبیاتېن مختلف بدیعی لیک قانون لارېنې باجاربلا مراعات ائدهن واقفین شعرلرینده سۆزلرین دۆزۆلۆشۆنده، سچیلمه‌سینده ائله غیر عادى بیر قانونا اویغونلوق گۆزلیلمیشدیر کی، اؤنا مداخله ائتمک، نه یینسه یئرینی دگیشدیرمک ممکن ده گیلدیر.»

۴- نظامی خودی اف:

«۱۷- ۱۸ سینجی عصرلرده ادبی- بدیعی دیلین حقیقی- ادراکی مضمونونو ملا پناه واقفه قدر ال وئریشلی شرایطده انعکاس ائتدیرن ایکینجی بیر صنعتکار تصور ائتمک چتین دیر. شاعرین بیر خدمتی ده اوندان عبارتدیر کی، او سؤزؤ ملی- معیشت طبیعی لیگیندن چبخارمادان قایدا- قانونا اویغون لاشدیر. پر.

واقف ناتورالیزمی نین اجتماعی- ملی مضمونو شاعرین ادبی- بدیعی تفکرونون ایضاحیندا و ادبی- بدیعی دیلی نین تحلیلینده اهمیتی، ملا پناه واقف دیلی نین زنگین جمله قورولوشودا، اؤنون خلقالی ایلله سیخ باغلی اولماسیندان ایرهلی گلیر. جانلی دانشیق نحوی نین (سینتاکسی نین) ادبی- بدیعی دیله گتیریلمه سی، اوزهرینده ایشلنمه سی و عادی حادثه یه چئویریلمه سی م. پ. واقفین بؤیوک خدمت لریندن دیر.

شاه اسماعیل ختایی، محمد امانی و ملا ولی و دادی خطی ایلله یوکسله ن، اؤلچؤ- بیچی تاپان قوشما شعر قالبی محض م. پ. واقفین فعالیتی ایلله، ملی و ادبی- بدیعی جریانین آپارچې شاخه سینه چئویریلمله جاری گؤزللیک دؤشونجه سینین اساس افاده فورماسی کیمی چېخېش ائدیر.

کلاسیک دیل- اُسلوب تیپی ایلله معاصر مطلبلری افاده ائتمک جهدی، م. پ. واقفین دیلی نین مهم خصوصیت لریندن بیریدیر.

اؤنون تشبیهلری نین هر بیرى اؤز اؤزلؤگونده و بۆتۆلۆک ده زنگین تخیل و تصور اویاداراق واقف دیلی نین استه تیک کیفیتى باره ده فکر اویادیر.

واقف ادبی- بدیعی دیلین ملی اساس لار اوزهرینده تشکیلی، ملی لشمه سی و تکاملونده هر طرفلی ایش گؤرمۆشدۆر. واقفین دیلی نین تاریخی کیفیتى داها چؤخ

واقف، گۆزەللىك و حقيقت شاعرى ❖ ۱۷

اۈنۈن فۈلكلور ژانرلارېنداكى اثرلرېندە (قۇشمالارېندا) تىظاھر ائىدىر. اثرلرى مىندرجە و مضمون باخېمېندان اۈلدوقجا رئال، معاصر، معین و تأثیر ائىدىجى دىر. واقف شەرىنىن بۇيۇك حىياتى قوھسىنى حس ائىدن، ادبیاتى مېزېن تىكاملونىدە گۆستردىگى قوتلى تأثیرى يۇكسك قىمت لىندىرن فرىدون بگى كۆچرلى دىر.»

واقف كىمى شەرتلى و بۇيۇك ادبى - مدنى شىخسىت حاققېندا عالملىرىن آپاردېقلارې تدقیقلىرى، یازدېقلارې اثرلرى، معنالى ملاحظەلر و دولغون دۆشۈنجهلرېنى، اوستادىم دىكتر حسین محمدزادە صدیقین واقف بارەسىندە، ۴۱ ایل قاباقكى تدقیقاتى، واقفین و اۈغلونون نامردسىنە آجېناقلى طرزىدە اۈلدۈرۈلمەسى و . . . مترجمى ترجمەىە ھوس لىندىرمىش و اۈنو حرىكتە گىرىمىش، شەھىد شاعرىمىزین عزیز خاطرەسىنى یاد ائىتمك اۈچۈن قوت وئرمىش، اۈنو شعر و شاعرىلىگە علاقه لىندىرمىش دىر. امید ائىدىرم حىمجە كىچىك و یېغىام و معنجا درین و گنىش بو كىتابجا، اۈخوجولار اۈچۈن یارارلى، تدقیقاتچىلار اۈچۈن فايدالى و ادیبلر اۈچۈن دىگرلى اۈلسون.

اوستادىم دىكتر صدیقین فارس دىلىندە یازدېغى «واقف، شاعر زیباىی و حقیقت» كىتابىنېن تۈركى ترجمەسىنى ۱۳۸۸ -نجى ایل اسفند آیېنېن ۶ -نجى گۆنۈندە كرج شەرىندە باشا چاتدېردېم. بورادا قید ائىتمەلىەم كى اوستاد یاخېن ایللردە واقفین شەرلر دیوانېن مكمل صورتدە تصحیح و چاپ ائىتمىشدىر. مىن دە شعر مىثالارېنې ھمىن چاپدان گۆتۈرۈپ بو كىتابدا نقل ائىدىم.

مقدمه‌نین قایناق‌لاری:

- ۱- واقف، ملاپناه. دیوان اشعار ترکی ملا پناه واقف، مقدمه، تصحیح و تحشیه: دکتر حسین محمدزاده صدیق، تبریز، نشر اختر، ۱۳۸۸.
- ۲- کوچرلی، فریدون. آذربایجان ادبیاتی، ترتیب ائده‌نی: رقیه قنبر قیزی، علم نشریاتی، باکی، ۱۹۷۸.
- ۳- عمید، حسن. فرهنگ فارسی، نشر امیرکبیر، تهران، چاپ دوم، ۱۳۶۷.
- ۴- آراسلی، حمید. آذربایجان ادبیاتی تاریخی و پروبلملری (سئچیلیمیش اثرلری) بیر جلدده، گنج‌لیک نشریاتی، چاپا حاضرلایانی: مریم آخوندوا، باکی، ۱۹۹۸.
- ۵- خودی‌اف، نظامی. آذربایجان ادبی دیلی تاریخی، کؤچورن: حسین شرقی، تهران، مؤسسه‌ی فرهنگی انتشاراتی راستان، ۱۳۷۷، چاپ اول.
- ۶- صفرلی، علیار. یوسفلی، خلیل. آذربایجان ادبیاتی تاریخی، کؤچورن: حسین شرقی، تهران، مؤسسه فرهنگی انتشاراتی راستان، چاپ اول، ۱۳۷۶، بیرینجی جلد.
- ۷- نباتی، سید ابوالقاسم. دیوان اشعار ترکی، تصحیح، تحشیه و مقدمه: دکتر ح. م. صدیق، تبریز، نشر اختر، ۱۳۸۵، چاپ سوم.
- ۸- سیداف، نورالدین. آذربایجان شفاهی خلق ادبیاتینا دایر تدقیق‌لر، اوچونجو کتاب، علم نشریاتی، باکی، ۱۹۶۸.

واقف، گؤزهللیک و حقیقت شاعری ❖ ۱۹

۹- آریان پور کاشانی، عباس. آریان پور کاشانی، منوچهر. فرهنگ جیبی فارسی به انگلیسی، تهران، امیرکبیر، ۱۳۶۲، چاپ دوم.

۱۰- حسین اف، حیدر. روسجا- آذربایجانجا لغت، علم نشریاتی، باکی، ۱۹۴۱.

۱۱- المنجد فی اللغة و الاعلام، بیروت، دارالمشرق، الطبعة الحادیة و العشرون، ۱۹۷۳.

۱۲- احمداف، تیمور. آذربایجان یازبچیلاری، اؤن اثر نشریاتی، باکی، ۱۹۹۵.

محمد داوریار اردبیلی

کرج - ۶ اسفند ۱۳۸۸

۱ - تاریخی و سیاسی زمینه

۱ - ۱. شاه ختایی نین عمل‌لری

شاه اسماعیل ختایی نین دولتی نین تشکیلینی، آذربایجان ادبیات تاریخینده، ادبی - مدنی حیاتدا دیرچه‌لیش حساب ائدیرلر. باشقا سؤزله اؤنون دورو، آذربایجان ادبیات و دیلی نین رسمی لشمه‌سی کیمی قید ائدیلر.

شاه ختایی نین دولتی مونقول لارین حاکمیتی زمانیندا، قیزیل‌باشلار حرکاتی ایله باغلبدیر و آذربایجانین کؤچری تۆرک قبیله‌لری نین فعالیت‌لری نتیجه‌سینده تشکیل ائدیلیمیشدیر.

شاه ختایی، اؤز حکومتی دورونده، «شیعی لیگی» ایراندا رسمی مذهب کیمی اعلان ائتمیش، ائل ادبیاتی و فولکلوریک متن‌لرده «نجات وئریجی و ائل سئون» بیر سرکرده اولاراق تصویر ائدیلیمیشدیر. مثال اولاراق شاه اسماعیل آدلې عظمت‌لی منظوم عاشقانه حماسه و اولارلا ناغیل و خلق ماهنی‌لاری، اؤنون یاخشې عمل‌لرین تصدیق ائتمیشدیر.

شاه اسماعیل ختایی نین خلق طرفیندن قیزغین آلقیشلانیب بیگه‌نیلمه‌سین عالمر آشاغېداکې عامل‌لرله افاده ائدیرلر:

۱. اقتصادی - اجتماعی عامل‌لر، مثلاً آذربایجان کندلری نین مالیاتی نین بیره آلتې آزادیلما‌سی و بونولا کند یوخسول لاری نین رغبتینی قازانماق.

۲. ادبى - مدنى عامل؛ آذربايجان دىلى نىن رىسمى لىشديريلمەسى، مەكتەپلەردە، تەكىلەردە تەدرىسى، شاعەرلەر مەلىك الشعرا حېيىبى و كىشورى دن حەمايتى، اۆز دۇرو اۆچۇن آذربايجانېن شعر و ادبىياتى نېن تەكاملونده مەهم خەدمەتلەردن ايدى. آذربايجان و اۇنا بېتېشىك ولايت و ايالتلەر، شاه اسماعيل ختايى نىن اۆلۇمۇ و صفويه امپراطورلۇغونون ضعيفلمەسى و داغېلماسېندان سۇنرا، ايران شاهلارې، عثمانلى و روسىيە دولتلىرى و خانلارېن چاپۇلچۇلۇق، اۆز باشېنالېق و تالانچېلېق ميدانېنا چئۇيرىلدى.

۲- ۱. نادر شاهېن ھەمراى لىگى

افغانلارېن اورتا شرق دە حاكىمىتى دۇرونده؛ آذربايجانى عثمانلىلار اشغال ائتمىشىدىلەر. روسلار بونا دۇز مۇردۇلەر، بونولاياناشى، آذربايجانېن ھەر طرفىندە «مستقل حاكىمىت قورماق» حركاتى باش وئىرىدى. . . . ۱۱۴۶ (ھ. .) سىنچى ايلده روس دولتى يئنىچە شاهلېغا باشلامېش نادر شاه ايلن «آذربايجانى عثمانى دولتىندن آزاد ائتمەك حاققېندا دىپلماتىك دانېشېق آپاردې»؛ مذاكرەنىن نەتىجەسى اۇلاراق نادر شاه چۇخ سايىلې قۇشون دىستەلىرى و روسىيەنىن سىفىرىنىن مشايەتى ايلە آذربايجانا ھجوم ائتدى. آذربايجانېن جنوبى منطقەلىرىنىن اھالىسىنى قىرىب اۆلدۇرۇب، شەرلىرى دارماداغېن ائتىكىدن سۇنرا، شىروان شەرىنە وارد اۆلۇب؛ كورچايى اطرافېندا؛ داغستان قەرمانلارې آراسېندا يئرى اۆلان «سورخاى خانى» قتله يئتىرىب شاماخى و گنجهنى اشغال ائتدى. . . . اعتراض حركاتى و اجتماعى ھىجانلار باسدېرېلدېقدان سۇنرا، محرم آيېنېن ۲۶ ى ۱۱۴۸ ھ. ق. (۱۱۱۴ ش - ۱۷۳۶ م.) ايران و عثمانلى

دولتلىرى آراسىندا ايروانىن گۆن باتانىدا «مراد تپە» آدلې بىر محل دە قورخونچ بىر محاربە باش وئردى؛ محاربەنىن گئىشىندە؛ عثمانلىلار مغلوب اولوب؛ عبدالله پاشا و مصطفى پاشا- ديار بكرين حاكىمى اولدورۇلدۇلار؛ ايكى دولت آراسىندا «بارېشېق» الدە ائىلدىكىدن سۇنرا «بارېشېق سىندلريندە» قىد ائىللىردى كى: «آذربايجان اياتلىندىن يالنىز قارص عثمانلىلار بىن حاكىمىتىندە اولمالېدېر.»

نادر شاه سۇنرا، آذربايجان و اۋنون قۇنشولوغونداكى اياتلىرىن بۇتۇن خانلار و آزادلىق سئورلىرىنى تاپدالايلاق، اۇنلارې حاكىمىتدن اوزاقلاشدېردې، اۋ جملەدن «تھمورس» گرجستانېن پادشاهىنى قتله يئتيرىب؛ و على مىرزە آدلې بىر يىنگى مسلمانى گرجستانا حاكم تعيين ائتدى؛ ها بئله ۷- آى عرضىندە داغستان و لزگى خلقىنى كۇتلهوى صورتدە اولدۇتدۇرۇب سېخېشدېردې و سۇن اۇلاراق؛ تفلىس اطرافى اھالى سىندن ۶ مىن عائلەنى خراسانا كۇچۇرتدۇ. نادر شاه آذربايجانېن ان گۇجلۇ عصيان منبعى يعنى پناه على بگىن دولتىنىن قاراباغدا گۇجۇنۇ حس ائتىكدە؛ اھالىنىن سرخس شېرىنە كۇچۇرۇلمە بوىروغونو وئرىب؛ عصيانچىلار و پناه على بگىن قتلىنە فرمان وئردى . . .

پناه على بگى، نادر شاهېن اىيگىندىن خبردار اولوب؛ عصيانېن باشچىلارې ايلن آنا يوردون اطراف داغلارېنا سېغىناراق نادرىن اۇلۇمۇ نەجك؛ ياربم قاچغېن وضعىتدە دولت قۇشونلارې ايله مبارزە و محاربە ائتدى. نادر شاهېن قتلىندىن سۇنرا، سرخس شېرىنە كۇچۇرۇلمۇش قاراباغلېلار؛ آنا يوردا دونمگە موفق اولدولار. خلقىن قاراباغقا قايتماسې؛ پناه على بگى و سلاحداشلارېنېن جرأت و

جسارتىنى آرتىردى. اۇ، يۇخسول و يازىق شىھر و كىندىلىرى اۇز اطرافىنا تۇپلايلاق؛ دولت آداملارې ايلن آچىق مبارزىيە گىرىشىدى. اۇنون عصيانى، نادر شاھىن حاكىمىتى آلتىندا اولان آذربايجانېن باشقا ولايتلىرىندە دە آزادلىق حرىكاتىنا تكان وئردى. . .

۳- ۱. خانلىقلارېن منشائى

نادرشاھىن اۇلۇمۇندىن سۇنرا، آذربايجان خلقى حرىكتە گلىب. يئرلى (محللى) حكومتلىرىدىن عبارت خانلىقلار تشكىلاتىنى قوردولار؛ ماكى، خوى، قاراباغ، شىروان، باكى، گىنجە، شكى و سايرخانلىقلار بىر- بىرىنىن آردىنجا تشكىل ائىلدىلر. خارجى عنصرلىرىن هجوملارېنا قارشى و بىگانىلرىن حاكىمىتى عليھىنە اولاراق بىر- بىرىنىن آردىنجا تشكىل ائىلدىلر، بۇتۇن بو خانلىقلار، پناه خانىن باشچىلىق ائىدىگى قاراباغ خانلىقىدىن جسارت و الھام اولاراق. اۇنون مادى- معنوى ياردىمىنا آرخالاندىلر. . .

پناه خان (= پناه على بگى) ۱۱۲۷ ش. سىنجى (۱۷۴۸ م.) اينجى ايلدە شاھرخ مىرزانىن دىپلوماتىك كلكلىرىنى پوچا چېخارتماق اۇچۇن؛ «بايات» دا محكم بىر قلعه تىكىدىردى و ۱۱۳۱ - ش. (۱۷۵۲ م.) دە باشقا بىر قلعه «شاھ بولاق» دا بنا ائىدىر ك خانلىقىن مركزىنى اورايا كۆچۇتدۇ. ايران ساراينىدا باش وئرن يىئنى حادثىلر و محمد حسن خان قاجارېن حاكم اولماسى، پناه خانېن مدافىعە تدبىرلىرىنى آرتىردى. اۇ، ۱۱۳۳ ش. (۱۷۵۴ م.) اينجى ايلدە، آذربايجانېن سىياسى، اجتماعى و مدنى حياتىندا مھم و اساسلى رولو اولان «شوشا» قلعهسىنى تىكىدىردى. قلعهنىن بىناسىدىن بىر ايل سۇنرا، قاجار شاھى

محمد حسن خان، چوخ سايىلې تجهيز ائىلميش و اؤلوم ساچان قوشون ايله شوشا قلعه سینه هجوم ائتدی، قلعه نى آلمانغا نائل اولمايىپ و خاتون دان او طرفه قدر ايره لیلیه بيلمه سی باشقا هجوم لار، او جمله دن فتحعلی خانېن ۷ – آردېجېل هجومو نتیجه سیز اولاراق، قاراباغ ایالتی نین اله کئچیريلمه سی و اونون خلقی نین اسارتینه سبب اولمادی . . .

پناه خانېن وقت سیز اولۇمۇندىن سۇنرا، اونون اولغو ابراهيم خليل خان، آتاسې نېن دۇشۇنجه لرینه عمل ائده رک، پناه خانېن ایسته ک لرینی یئرینه یئتردی. ابراهيم خليل خانېن دۇرۇنده، آذربایجانېن ادبیاتی و اینجه صنعتی، دگیشیک لیگه اولغرادې و تکامل تاپدی. شعر، نثر، موسیقی، رسام لېق، خطاط لېق، معمار لېق وس. ساحه لرده قیمت لی اثرلر یارادېلدى. شفاهی ادبیات سرعتله چیچک لندی، باجاربقلې عاشیق لار یئتیشیب، باشقا عاشیق لارېن اوستادی اولوب اونلارې الهام لاندېر دېلار.

بو ایل لرده، شوشا شهری «علم و ادبیات مرکزینه» چئویریلهرک آذربایجانېن بۇيۇک شهرلریندن بیرى حساب ائدیلىردى. قاراباغ منطقه سی واقفین آنايوردو، آذربایجانېن باشقا ایالتی و منطقه لری کیمی، شاه اسماعیل دان سۇنرا، خصوصی ایله نادر شاه و بۇيۇک پتر زمانېندا، مختلف یورش و هجوم لار میدانى ایدی، بیر یان دان روس دولتی نین، آذربایجانى اشغال ائتمگه گۇجلۇ تمایلی وار ایدی، روس دولتی نی بو ایشه تحریک ائدن ان مهم عامل بۇيۇک پترین وصیتینه عمل ائتمک یعنی آچېق دنیزلرده ساحل صاحبی اولماق ایدی. او بیر طرفدن ده ایران حکومتی هچ جور راضی لاشمېردې کی، حیاتی، حربی و

اقتصادی نظردن دگرلی اۆلن آذربایجان کیمی ثروتلی منطقه‌نی الدن وئرسین
چۆنکۆ ۱۷-نجی عصرده شرق ایله غرب آراسیندا کشف ائدیلن دنیز یۆللاری،
ایران حکومتینین اقتصادی موقعیتینی یعنی اونون اراضی سیندن کئچن اروپا و
هندوستان لېلارېن تجاری امتعه مبادله‌سی تهله‌کلی وضعیت ایله
قارشېلاشمېشدې. بونولا بئله ایران حکومتی، ساری و نظامی اُردو
ساخلاماغن مخرجېنی تامين اۆچۆن، خلق کۆتله‌لرینین استثمارینی
شدتلندیریدی و برکتلی و هر جور مادی - طبیعی نعمتی بول اۆلن
آذربایجان ایالتینی اۆز حاکمیتی آلتیندا ساخلاماغا جد-جهدله چالېشېردی. بو
عاملده اۆز نوبه‌سینده آذربایجانلی لارېن آزادلیق مبارزه‌لری اۆچۆن دقته لایق
شرایط و امکانات یارارېردې . . .

بو اۆزۆنه مخصوص تاریخی دورده و مذهبی چکېشمه‌لرین باش وئردیگی
بئله تاریخی شرایطده، آذربایجاندا داها بیر-بیری نین آردېنجا مختلف
خانلق لار تشکل تاپیب وجودا گلدی. ۱۱۵۸ هـ . (۱۱۲۲ ش . - ۱۷۴۳ م .)
اینجی ایلده نادر شاهین اویونجاق حاکمی ملک نجف، شکی‌ده، چلبی خانېن
الی ایلن اۆلدۆرۆلدۆ و شکی خانلېغې ۱۸-ینجی عصرده تشکل تاپاراق آزادلیق
و استقلالیتینی اعلان ائتدی . . . نادر شاه چلبی خانېن بو عمل‌لریندن
عصبی‌لشه‌رک ۱۷۴۷-ینجی ایلده بو خان‌لېغا یورش ائتدی، اما چلبی خانېن
ساری شاعری «نبی» دئمشکن موفقیت‌الده ائده بیلمه‌دی:

شاه نادر چون گتیردی اۆستۆنه یۆز مین سوار،

سن برابر جنگه دوردون، کیمده وار بو اختیار؟

دۇندۇ گىتتى، خجلتىندىن آخر اۇلدو شرمسار.

نادر شاھىن قتلە يىتيريلمەسى، آزادلىق حرکاتىنى گىنىشلىدىرىپ و بىر سېرا خانلىقلارېن، ماكى، خوى، سراب، نخجوان، شىروان، تالش، درىند، باكى، قوبا و قاراباغ خانلىقلارېن تشكىلىنە سىب اولدو . . .

قارا باغ، شكى و قوبا (=قۇبە) خانلىقلارېن حاكملىرى واحد و متفق حكومت ياراتماق اوچۇن بىرلىشىلر و نادرېن اولۇموندىن سۇنرا گوجلىدىلر، او قەدر كى چلبى خان تېرىز شېرىنى نادر شاھىن تەيىن ائىدىگى حاكمىن الىندىن آزاد ائىدى. فتحلى خان، قوبا خانلىقىن حاكمى، غمۇنۇن ۳۱ - ايلىنى خىزىن ساحللىرىندىن اردىبلە قەدر كى اراضىدە بىرلىش خاىلىق لارېن بىر لشمەسى اوچۇن صرف ائىدى.

مستقللىك سۇنەن خاىلىق لارېن بو بىرلىك و متفقلىگىندىن آغا محمد خان قاجار واهمەلىدى. بو قۇرخونون اساس اقتصادى ماهىتى اۇندان عبارت ايدى كه: ايران و عثمانلى اولكەلرىن عكسىنە اولاراق، آذربايجان خانلىقلارېن بىن المللى تجارت دە خصوصى موقعيت و اهميتە مالک ايدىلر. بئله كى بو خانلىقلار خىزىر- وولقا تجارتى دنيز يولو اۇستۇندە ايدىلر و خانلىق لارلا قفقاز و روسىيە آراسىندا تجارتى علاقەلر، گۇنۇ- گۇندىن گىنىشلىنىپ، تىكاملە دۇغرىو گىدىردى. بو ان مهم اقتصادى مسئلەنىن قاجار ساراينىداكى اداملارلا حياتى دىگرى وار ايدى. بو اقتصادى مسئلە قاجار شاھى آغا محمد خان قۇشون لارېنېن، آذربايجان تۇرپاق لارېنا ھجوم و يۇرۇشلىرىنىن اساس

حرکت و ئىزچى عامل ايدى. قاجار دۇرۇنۇن يازىلىپ تارىخى منبع لىرىندە، بو يورش و قان تۆكمەلرە اشاره ائىدیلیب دیر. *ناسخ / توارىخ* مؤلفى ۱۲۱۵ هـ . اینجى ایلین حادثەلیرینی یاد ائدرکن، بو بارە یازېر: «سلیمان خانى ۶ مین نفر ایلە تالېشا گۆندەردى تا اۇراداکی اھالینی غارت ائتسین. تالېش لارېن اړواد و اوشاق لارېنې دا زنجانا سۆرگۆن ائتدی. پادشاه فرمان وئردى سراب شەرىنى دە خرابا قويوب اود وورسون لار . . . »

بو دۇردە ابراهیم خان، اۆز حاکمیت بینوورەلیرینی محکم لندیریب، باشقا خان لېق لار دا عصیان و شورش ائتمگە جسارت گۆستیردیلر. بو حیص و- بیص دە، گرجستان حاکمی «هراکلیوس» روس دولتى نین قفقازدا گیزلی مأمورو، قاجار ساراېنا اطاعتدن بۇیون قاچېرتدې و گرجی لری تضییق، عذاب و اذیتدن قوتارماق اۆچۆن، روس دولتیندن یاردېم ایستەدى، بو ایستک آغا محمد خانى هارېن لاشدېردې.

مورخ لیرین روایت لیرینه گۆرە، آغا محمد خان - کی هر شئیدن چۆخ قاراباغ خانلېغېندان قۇرخوردو- ۶ مین قۇشون ایلە ۱۲۱۰ هـ . (۱۷۹۵ م.) بايرامدان ۵۳ گۆن سۇنرا، تهران دان حرکت ائتدی. سراب، خلخال و اردبیل ایالت لیرینده قېرغېن و غارتدن سۇنرا، آراز چاپېنېن ساحل لیرینه یئتیشدی. قۇشونونو اۆچ حصّه یه بۆلدۆ. ساغ طرفدن مغان، شیروان و داغستانا هجوم ائتدیلر، سؤل طرفدن ایروان خانلېغې و پای تاختا، اۆزۆده قۇشونون مرکزی ترکیب حصّه لری ایلە شوشا قلعه سینه یعنی قاراباغ خان لېغېنېن مرکزینە، ابراهیم خان حکومتی نین بیرلشدیردیگی محله یۆرۆش ائتدیلر.

۴- ۱. آغا محمد خانین هجومو

یوخارېدا قید ائتدیک کی قفقاز اراضی لری و آذربایجان ایالت لری، نادرین اؤلوموندن سونرا، مستقل لیک کسب ائتمیش و آذربایجانین شمال و جنوبونداکی خان لېقلار بیرلیک و بیر- بیرینه باغلی لېق طرفینه دؤغرو حرکت ائدیردیلر. آذربایجان اراضی سینی اشغال و خان لېقلاری ایرانین مرکزی دولتینه تابع ائتدیرمک و اؤنلاری اطاعتده ساخلاماقدان آغا محمد خانین اساس مقصدی، بو منطقه دن صنایع اؤچون خام مال تامین ائتمک و اورانی ایرانین ایراندان استحصال ائدیلن ائتمه نین ساتیش بازارینا چئویرمکدن عبارت ایدی.

آغا محمد خان، بو اراضی نین (قفقاز و آذربایجان ایالت لری نین) تکلیفینی بیر دفعه تعیین ائتمه اؤچون، اولجه، گرجستان حاکمی هراکلیوسون سارایینا بیر نفر سفیر گوندردی و اؤنو مطیع اولماغا دعوی ائتدی. هراکلیوس تسکین لیکله بو چاغربشی رد ائتدی. آغا محمد خان تفلیسه هجوم ائتدی، هراکلیوس بو یوروش دن خبردار اولان کیمی، اؤنو مشایعت ائدن قوشون ایله (آغا محمد خانین دؤرده بیر قوشونو قدهر آدم) تفلیس دن اوزاق لاشدی و شهر دن ۱۵ میل اوزاق لېقدا اؤز موقع لرینی محکم لندیریب، آغا محمد خانین قوشونو ایله شدتلی دؤیوش لره باش چېلیق ائتدی . . .

راوی لر روایت ائدیرلر کی گرجی لر بو محاربه ده نهایت درجه ایگیدلیک و قهرمان لېق گؤستریدیلر. ولاکن چوخ سایلی قوشون ایگیدلیگه غلبه چالیدی و گرجی لر مغلوب اولدولار. هراکلیوس بیر دسته یاخین آدمالاری و بعضی قوشون حصه لری ایله اطراف داکی داغلارا پناه گتیردی، قوشون لاری تفلیس

شەھرىنە داخلىق اولوب، قېرىغېن تۆرەدىب، شەھرى غارتە باشلادېلار. آغا محمد خان قاجارېن تارىخىنى قىلمە آلان مىسلمان بىر مورخ، مىسلمان لارىن عدوان و عىيانېندان دوغان نىجەلرى شرح ائدەرك يازېركى: «آغا محمد خانېن ايگىد عىگرلرى، ساواش گۆنۆنۆ كافر گرجىستان لېلار قىامت گۆنۆنە و عىرصات محشرە چئويردىلر . . .» بو بۆيۆك مىصىتلى حادثە نىجەسىندە اۆلنلرېن ساپىسېنې تىمىن ائتمك چۆخ چتىن دىر. مەھبى تەصب كىلىك، وحشى جەسىنە عىبى لىمىش عىگرلرېن قېزغېن لېغېنا سىب اولدور.

ھەر يئردە كىلىسا وار ايدى يئر ايله يىكسان اولدو و ھەر يئردە كىشىش واريدى اولدورۇلدۇ . . . گۆزل اوغلانلار و گۆيچك قېزلار اولۇمدن قورتارېلاراق اسىر اولدولار.

آغا محمد خان تىفلىس شەھرىنى آلېب و غارت ائتمك ۲۲ و بعضى مىنلرە گۆرە ۲۵ مىن نفر آدمې (دىنج اھالىنى) اسارتە آلېب تەھران دا بى عار امىگە مجبور ائتدى. او تىفلىس، شىروان و اىروان دا اۆز ال آلتېلارېندان حاكملر تىيىن ائتدىكدن سۇنرا، گنجە شەھرىنە ھجوم ائتدەرك كۆر- آراز چاى لارېنېن قوشاغېندا موقتى مىسكون لاشدى.

بو مدت عرضىندە قاراباغ لىلارلا ياناشې آذربايجانېن باشقا ايالتلرېندن قاراباغ پناھ گتىرنلردە ابراهيم خليل خانېن باش چىلېغې و عمومى فرماندەلىگى و ملا پناھ واقىقېن ذكاوت و اوزاق گۆرن لىكلىگى ايله، شوشا قلەسىنە توپلاشېب قاجار قوشون لارې قارشىسېندا مقاومت ائدىردىلر.

توپخانا اولمادېغى اۆچۈن، شوشا قلەسى نىن آلېنماسى مەكىن اولمادى، بونا بىنائىن، آغا محمد خان فرمان وئردى كى قاراباغىن اطرافىنى غارت ائتسىنلر و بۆتۈن آبادلىق لارې سوسوز و اۆتسوز بىابانا چئويرسىنلر .

آغا محمد خان گۆزلەنلىمز و شدتلى مقاومتە راست گلدېكدە چارەسىزلىكدن تحقىرە ال آتاراق، مقاومت گۆسترن لرى «بىر آووج آج» و اۆنلارېن باش چېسېنى اسىر «اصل سىز نسب سىز چاروادار» آدلاندېراراق آشاغېداكى بىر بىت شەرى يازدېرېب ابراهيم خانا گۆندەردى:

ز منجنىق فلک سنگ فتنە مى بارد،
تو ابلهانه گىرفتى مىان شيشە (= شوشا) قرار.

و اۆنون جوايىندا، واقف شوشا قلەسى مبارزلىرى نىن شاعرى بئله يازدې:

گر نگهدار من آن است كه من مى دانم،
شيشه را در بغل سنگ نگه مى دارد.

آغا محمد خانېن وجودو انتقام آلوولارې ايله آلېشېب، تهرانا قايتدې كى باشېنا تاج قويمى مراسمى ترتيب ائتسىن. و بىر ايل سۇنرا، چۇخ سايېلې قۇشونلا آذربايجانا طرف حركت ائتدى. باشقا طرفدن، روسىيە پادشاهى ايكىنجى كاترىن دە، بۆيۈك پترىن وصىتلىرىنى اجرا ائتمەك اۆچۈن، مىنلرلە نەردن عبارت قۇشون حصەلىرى نىن «گودويچ» و «زوبوف» ون عمومى فرماندەلىگى ايله قافقازا سارى حركتە گتىردى و حملە ائتمەگىنى امر ائتدى . . .

آغا محمد خانېن ھجوموندىن قاباق قافقاز اراضىسى روس دولتىنىن
اوردوسو واسطەسىلە وحشىلىكلەرە معروض قالدې. كاترىنىن اۆلۆمۆندىن سۇنرا،
پاول روس پادشاھى، قۇشونلارېن ماسكووايا يعنى امپراطورلوعون مركزىنە
حرکت ائتمىگى امر ائتدى، «آغا محمد خان روس قۇشونلارېنېن
چاغرىلماسېندىن خبر توتان كىمى، آغېرىۆكلرى چتىن داشېنان سورساتى و
باھالى شىلىرى بوراخېب گۆدۆكچۆلرە تاپېشېرېب، آذربايجانا عمومى يۆرۆش
فرمانى وئردى.»^۱ آراز چاپىنا چاتدېقدا، سولار داشقېن عملە گىتىرمىش ايدى.
«امر ائتدى سوارىلر سودان كئچسېن، كفايت قدەر گمى يۇخ ايدى، بونونلا
بئلە چۆخ سايدا آدم، اۆزمكلە آرازېن اوتايىنا گىتمك ايستەدىلر، چۆخلو آدم آرازدا
بوغولوب اۆلدۆلر.»^۲

۱۲۱۲ ھ. (۱۱۷۶ ش. - ۱۷۹۷ م.) اينجى ايلين بهارېندا آغا محمد خان
شوشا شېرىنە ھجوم ائتدى، اۇرانى آلدې و «محکم بير حبس خانایا چئويدى .
. . « مينلرلە اھالىنى و مدنيت خادملرىنى قتله يئتيردى و ملا پناه واقف، اؤ
زمانېن شاعر، متفكر و اوزاق گورن وزىرىنى توتدوروب، الى باغلى قازاماتدا
ساخلاتدېردې كى صاباح اؤنو اۆلۆمە محكوم ائتسېن.

^۱ سرجان ملکم، ج. ۲، ص ۱۰۹.

^۲ سرجان ملکم، همان يئر.

۲- یاشاییشی

۱- ۲. دۇغومو

ملا پناه ۱۱۳۰ ھ. (۱۰۹۶ ش. - ۱۷۱۷ م.) ایلینده قازاخ، محالی نین «قیراخ صلاحلی» کندینده «آغا مهدی» آدلې یوخسول کندلی کیشی نین اوسماجا ائوینده دُنیا یا گۆز آچدی.

۲- ۲. یاشاییشی

اُونون حیاتی نین اوشاق لبق و یئنی یئتمه لیک چاغی هله ده آذربایجان ادبیات تدقیقاتچی لار بنا بللی دگیل دیر. واقف شناس لار ۱۷۵۹ سینجی ایلدن سؤنرا اُونونلا تانیش دیرلار. واقف، ایراکلی خانین شرقی گرجستان حاکمی نین هجوموندان سؤنرا، بیر چوخ زحمتکش یورتداش لاری ایله بیرلیکده قازاخدان قاراباغا کوچوب، و ۱۰- ایل مُدّتینده، قاراباغین «ترتر باسار» محله سینده اوتوراق لاشیب، سؤنرالار، «شوشا» شهری، آذربایجانین اؤ زمانکی علم، مدنیت و ادبیات مرکزینه گئدیب و «ساعتلی» محله سینده بیر مکتب آچیب، اؤرادا «معلم لیک» و «عریضه یازماق لا» یاشاییشینی دوام ائتدیرمیش دیر.

واقف، گۆزەللىك و حقيقت شاعرى ❖ ۳۳

ديوانبندان بللى دىر كى اۋايللردە، عذاب- اذيتلى و يۇخسوللوقلا دۈلو حيات
سۆرمۇش دۇر، قديم كيلر دئمشكن ملا پناھىن معاشې چۇخ چتىن كئچىرمىش.
بو بارەدە گۈلگۈلۈ طريق ايله مناسب حال شعر يازمېش دېركى، اۈنون پريشان
حالېنى و شكستە خاطرېنى بىرلىكدە بيان ائدىر:

بايرام اولدو، هئچ بىلىمرم نئيله يىم،
بىزىم ائودە دۈلو چووال دا يۇخدور،
دۇگۈ ايله ياغ هامې چۇخدان تۆكنمىش،
ات هئچ اله دۇشمز، موتال دا يۇخدور.

آلاھا بىزمىشىك ناشۇر بندە،
بىر سۆز دئسم، دخی قۇيمازلار كندە،
خلق ياتېبدېر نوغلا، شكره، قندە،
بىزىم ائودە آختا ذغال دا يۇخدور.

بىزىم بو دۇيادا نه مالېمېز وار،
نەدە ائودە صاحب جمالېمېز وار،
واقف اۋيۇنمە كى كمالېمېز وار،
آلاھا شۇكور كى كمال دا يۇخدور.

واقفين شعر قوشماسې و شاعرليگي نين دقيق تاريخى باره سينده معلوماتېمېز يۇخدور. آذربايجان ادبياتي نېن تدقيقاتچې لارې آيدېن لاشدېرمېشلار كى، واقف معلمليگي و عريضه يازماقلىغې ايله حرمت قازانمېش و قوشما قليبلى شعرلرى (خلق ديليندن و شفاهى ادبياتدان و هجا وزنيندن الهام آلماقلا) يازدېغې شعرلر واسطه سيله خلقي سئوگيليسينه چئويريلمىشدير.

دئمك اولاركي، شوشادا ياشاماق، خلق ايله انسيت ده اولماق و اونلارېن حُرمتيني قازانماق، واقفين ياشايېشېندا دگيشيك ليك عمله گتيردى. كند محيطينده يۇخسوللوق و جهالت شرايطينده، قازاندېغې ۴۰ - ايل ليك حياتى تجربه لريندن ياشايېشى نېن بو دُورونده استفاده ائتدى.

ادبي تدقيقاتدان معلوم اولموشدوركي، واقف شاعرليك و معلم ليكدن باشقا، باجاربقلي آتېچې و ماهر معمار ايميش و نجوم علميني خصوصى ايله سيّاره لرين حركت لريني تدقيق ائتمگي سئور ايميش.

آلمان شرق شناسى، آدولف برگر قيد ائدير كي، شوشا شېهرى نين بۇيۇك بنالارې اونون نظارتى آلتېندا تيكيليپ دير.

نئجه كي ملاولى و دادى واقفين معاصرى ده واقفه خطاب شعرلرينده بو باره ده معلومات وئير.

واقفين ياشايېشى شوشادا ابراهيم خانېن ادبيات و مدنيت خادملريندن حمايت ائتديگي ايللره تصادف ائدير، ابراهيم خان اولكه سى نين هر يانېندان شاعرلرى، آرتيستلر و اوزاق گورهن سياست آداملارېنى و دوست خادملرينى اوْز سارايېنا چاغرېردې.

معلوم اولدوغو كيمي «واقف» آيىن توتولماسى-نېن و بير زلزله-نى باش وئرمەدن قاباق خبرىنى ان ياخېن شاعر دوستو ودادى-يه وئرمىشدېر كى واقفين بو ايكي طبعى حادثه باره-سىنده كى دوشونجه-سى-نين دوزگون لؤگۆندن ابراهيم خان دا خبردار اولور.

۳-۲. سارای دا

ابراهيم خان، واقفى اؤز ساراينا چاغېرمېشدير. واقف از مدت عرضينده، ايستر سارای دا، ايسترسه ده خلق كۆتله لرى آراسېندا، شهرت كسب ائتميش، ذكاوت، قابليت و علمى-نين سايه-سىنده «ئشيك آغاسى» رتبه-سىندن وزير اعظم-ليك درجه-سىنه قدير يوكسلير و معاصر ادبيات-شناس، آراز داداش زاده دئميشكن: «اوزاق گورن و عاغېل لى دوست آدملا رى كيمي شهرت له-نير.»
واقف، باش ناظر (وزير) اولدوقدان سونرا، يئرلى مدافعه قوه لرىنى، اشغالچى و متجاوز خارجى قوه لره قارشى بيرلشديريب تجهيز ائديب و متشكل ائتميشدير، ها بئله خلق ادبياتى-نېن چيچكله نيپ زنگين لشمه-سى و ادبى ديلين دولغون لاشماسى و تكاملو اوچون حل ائديجى آدم لار اتمېشدير.
واقف بير شاعر كيمي خلقين اراده-سىنى قوتلنديرميش و ديپلمات اولاراق قاراباغ خانلېغى-نېن ادارى ايشلرىنى ساهمان لامېشدير.

خان لېغېن ديپلماتيك ايشلرى و سياسى عملياتى، سفيرلرين و سياسى مکتوب لارېن مبادله-سىنده (شوشا و باشقا خارجى دولت لرين پايتختلرينده، پترزبورگ، تفليس، تهران، آذربايجان خانلېقلارى و عثمانلى دولتى آراسېندا) واقف پارېجى رول اوينا مېشدير.

سفیرلرین اعزامیتی، مکتوبلار (سیاسی نوتالار)، دیپلماتیک یازېشما و خبرلشمه‌لر، هامېسې واقفین بیر باشا نظارتی ایلن انجام تاپیردې. واقف قفقاز و آذربایجان‌داکی حکومت و حاکم‌لرین بیرلیک و اتفاقی‌دا چوخلو امک صرف ائتمیش، بو مقصد اوچون ثمره‌لی تدبیرلر و سیاسی ایشلر اجرا ائتدیدی، بونا گوره‌دیر کی اونون مترقی و اوزۇنه مخصوص سیاسی باخېشى «واقف‌شناسلارین» دقتینی اوزۇنه جلب ائتمیشدیر.

قفقاز منطقه‌سینده و آذربایجانین جنوبی ایالت‌لرینده کی خان‌لیقلارین بیرلیگینی مدافعه، اشغالچیلارین قارشېسېنی آلماق اوچون اساسلی ایشلری، سیاسی دوشۇنجه‌لری، دشمن‌لرین تهلكه‌سینی دفع ائتمه اوچون، خارجی دولترلله قارشېلېقلى حرمت اساسیندا علاقه‌ده اولماق، واقفین مترقی سیاسی باخېشى‌نین اساس جهت‌لریندن دیر کی اونون اوزاق گۇره‌نلیک و سیاست آدمی اولماسېندان خبر وئیر. آراز داداش‌زاده‌نین فکرینجه «واقفین قاراباغ خان‌لیغېنی اداره ائتمک حاققېندا نظریه‌لری اؤز دورۇ اوچون چوخ مترقی ایدی». بئله‌لیکله‌دیر کی، او ایل‌لرده یعنی دشمنی دفع ائتمک اوچون، تدبیر تۇکۇلن ایل‌لر واقفین وطن سۇرلیگی داها قارباق، داها آیدېن نظره چارپیر.

او ایل‌لرده آذربایجانین مختلف ایالت‌لرینده یاشایان انسانلارین حیاتی‌ندان جانلی تصویرلر قلمه آلېر، خلق کۇتله‌لری‌نین یۇخسوللوغون‌دان، عذاب-ادیتلی یاشایېشېندان، خارابالېقلار و فلاکت‌دن آجې دویدوغونو افاده ائدیر:

قېش گۇنۇ قېشلاغې قېراق باسانېن،

گۇزۇدۇر آرانېن، جۇمله جهانېن،

بئله گۆزەل يىرىن، گۆزەل مەكانىن،
بىر گۆزەل اوباسى، حىيىف كى يۇخدور.

۴-۲. آغا محمد خان قاجار ايلن قارشى دورما

واقف دۇشۇنۇردۇ كى مستملكهچى دولتلىرىن قۇشونلارېنېن
وحشى جەسىنە قانلى يۇرۇشلىرى نتيجهسىندە، اۇنون آمال و آرزىلارېنېن پوچا
چېخاق، شەرلر و كندلر ويران، قيمتلى مدنى اشيا و خزىنەلر غارت و
عمارتلر خراب اولاجاق و كتابلار ياندېرېلاجاق دېر.

۲۰- ايل عرضينده آغا محمد خان، عراق عجمى، فارسى و اۇنون
اطرافينداكى اراضىنى اشغال ائتميش ايدى، ۳ گۇن شوشا شېرىنە داخل
اولدوقدان سۇنرا، اۆز نۇكرلرىنىن الى ايلن اولدۇرۇلدۇ . . . نوكرلر گئجه ايكن
شاهېن اقامتگاهېنا قدم قۇيدولار و ايتى قېلېنج ايله، ايرانېن ان مقتدر
پادشاهلاربندان بىرىنىن باشېنېن كسديلر . . .

واقف بو حادثەنى و دادى يە خطابن يازدېغې نامەلرده بئله انشاء ائيديدىر:

اى و دادى! گردش - دۇران كچ رفتاره باخ!

روزگارە قېل تماشا، كارە باخ، كردارە باخ!

اهل ظلمو نئجه بر باد ائيلهدى بىر لحظهده،

حُكمو عادل پادشاهِ قادر و قهارە باخ!

صبح سۇندۇ شب كى، خلقه قبلە ايدى بىر چراغ،

گئجه كى اقبالى گۇر، گۇندۇزدە كى ادبارە باخ!

تاجى زردن تاكى آيرېلدى دماغ پر غرور،
 پايمال اولدو تېپىكلردە سر سردارە باخ!
 من فقيرە امر قېلمېشىدى سياست ائتمىگە،
 قورتاران مظلومو ظالمدن او دم غفاره باخ!
 عبرت ائت، آغا محمد شاهدان، اى كمتەر گدا!
 تا حياتېن وار ايكن نه شاهه، نه خونخواره باخ!
 باش گۆتۆر بو اهل دنيادان آياق توتدوقجا قاچ،
 نه قېزا، نه اوغولا، نه آشنا، نه ياره باخ!
 واقفا، گۆز يوم، جهانېن باخما خوب و زشتينه،
 اۆز چئوير آل عبايه، احمد مختاره باخ!

بو حادثەدن سۇنرا، آغا محمد خانېن قۇشون لارې غارتله مشغول اولوب،
 سۇنرا عراق عجمه طرف حركت ائدەرک، اوردونون سرکردهلرى ديديشەرک
 داغېلدېلار. . . واقفده صبحون آچېلماسې و اولۇم حکمۇنۇن انتظارېندا ايدى،
 معجزهلى صورتده زندان دان خلاص اولدو.

۵-۲. اولۇمۇ

هر چند ملا پناه آغا محمد خانېن اليندن خلاص اولدو، اما محمد بگين
 الينده گرفتار و هلاک اولدو. محمد بگي اعيان و اشراف واسطه سيله، او زمان
 كى شرايطين گرگين ليگيندن استفاده ائدەرک شوشادا اؤزۇنۇ حاكم اعلان
 ائتدى. او شاعر و سياست آدمى اولاراق واقفى اۆز مقصدلرى اۆچۇن بير مانعه

واقف، گۆزەللىك و حقيقت شاعرى ❖ ۳۹

حساب ئىدىردى، بىللەلىكلە اۆنو ۱۱۷۶ ش. - ۱۷۹۷ م. اينجى ايلده ۸۰ ياشاشىندا اۇغلو ايله بىرلىكدە آجىناقلې طرزده شوشا شەرىنن گۆن چىخان طرفىندە، جىدىر دۆزۆ آدلې محلده دارا چكدى. واقف اعدام اولدوقدان سونرا، ائرمىنى لىر ائوينى غارت و شعرلىرىنن اليازمالارېنى ياندېردېلار. . .

اما واقف و شعرلىرى آرادان گىتمەدى، مجسمەسى اوركلرده اوجالدى و ماھنېلارې، دوداقلاردان دۆشمەدى، بونا گۆرەكى اۇ، ان قىمتلى ادبى - مدنى مىراثلاردان غىدالانىب، قديم، كۆكلۆ، زنگىن مدنيت و ادبىياتىن محكم اۆزۆلۆ اۆستۆندە بوى اتمېش دىر.

۳- ادبی زمینه

آذربایجان تاریخینده واقف، بیر شاعر اولاراق تانینمیشدیر. ۱۲-ینجی عصر، آذربایجان ادبیات تاریخینده «واقف عصری» آدلاندیریلیدیر. واقف محمد فضولی دن سونرا، ان پارلاق ادبی- مدنی شخصیت دیر کی، آذربایجان لیلار دنیایه تقدیم ائتمیشدیلر.

واقف یارادبجی لېغی ایله، تۆرک ادبیات تاریخینده «دورغونلوق دورؤ» باشاچاتدی و بو ادبیات یئئیدن جان لاندی. واقف شعرى نه وحى و الاهى الھاملار و نه مجرد و فردى دویغولاردان عبارت ایدی. اونون بیر ادبی شخصیت کیمی یئتیشمه سی نین سیاسى- اجتماعى عامل لردن باشقا (قاباقکی صحیفه لرده قیسساجا قید ائیلدیگی کیمی) دفته لایق ادبی- مدنی کوکلری واردیرکی ایندی یئنی چاغدا اونون تدقیقى «واقف شناس لېق» ساحه سینده ان واجب مسئله لردن دیر . . .

آذربایجانین ادبیات و شعر تاریخی نین تصنیفاتیندا واقف، کلاسیک شعر دورؤنؤن نماینده سی دیر. حروفیه حرکاتی نین باشلانغیچیندا، یعنی آذربایجان کلاسیک شعرى دورؤنؤن باشلانغیچیندا- آذربایجان دا، یۆز ایل لر بویو دوام ائدهن سنت - مذهب دیلی اولاراق عربی و ادبیاتین دیلی فارسجا - گؤجلؤ تأثیره مالک ایدی و آنادیلده شعر قوشان، رساله یازان لار، یا ایکى دیللى

شاعرلر ایدیلر و یاخوددا سارای‌لاردان اوزاق و صوفیه طریقت‌لرینه باغلی ادبی شخصیت‌لر حساب اولونوردولار.

۱- ۳. قاضی برهان‌الدین

آذربایجان ادبیات تاریخینده صوفی لیگین بانی سیدیر و یوخاریدا دئیگی‌میز ایکینجی دسته‌یه منسوب دور. اوندان سؤنراکی شاعرلرین چوخو، یعنی عارفانه- صوفیانه شعرلرین شاعرلری، اؤنون شعر اُسلوبو و افاده طرزیندن تأثیرلنمیشلر و نهایت ۱۰- سونجو عصرده (ه. ق.) محمد فضولی آذربایجان شعرینه یئنی یول آچماقلا اؤنو یوکسک ایده‌آللی فلسفی تعلیم‌لرله بیرلشدیرمکله، اؤزوندن سؤنراکی شاعرلرین الهام وئریجیسی و باش‌چیسی اولموشدور.

قاضی برهان‌الدین آذربایجانین بیر حصّه‌سینده قېسسای مدتلی مستقل حاکمیت قورماقلا اولومونه دک، آنا یوردونو عثمانی امپراطورلوغو و توپال تیمورون دولتی‌نین تجاوزکارجاسینا هجوم‌لاریندان قورودو و بۆتۆن عمرۆنۆ بو یولدا مبارزه‌یه صرف ائیلهدی. بو مبارزه‌ده اؤزۆنۆ شاعرلیک استعدادیندن استفاده ائده‌رک، شعرى اشغال‌چیلارا قارشى سالاها و ان کسرلى واسطه‌یه چئویره‌رک خلق کۆتله‌لری‌نین دشمن‌لری علیه‌ینه یۆنلده‌رک قهرمان‌لیق و جنگ‌آورلیک نغمه‌لری قوشوردو.

قاضی برهان‌الدین، قهرمان‌لیق و ائپیک (حماسی) شعرلرینی فولکلوریک اُسلوب‌لاردا قوشوردو، و غزل‌لری کی آذربایجان غزلی‌نین ایلکین

نمونه‌لریندن دیر، ساده، آخجی، آنلاشېقې دیلده یازېلمېش و اؤنلارېن مضمون‌لارې سؤگې، عشق، دؤزگۆن‌لۆک، ایگیدلیک و نیسگیل‌دن عبارت‌دیر.

۲-۳. عمادالدین نسیمی

قاضی برهان‌الدین حاکمیتی باشا چاتدېقدان سؤنرا، حروفیه حرکاتی باشلانېر. عمادالدین نسیمی تبریزی کی تدقیقاتچېلار اؤنو «آذربایجان کلاسیک شعرینین آتاسی» حساب ائدیرلر، بو حرکاتلا باغلی ایدی. ایران و اؤنون اطرافیندا کی اۆلکه‌لرین تاریخینده، «حروفی‌لیک» ائله بیر مسلک و طریقه دئییلیردی کی توپال تیمورون آذربایجانا و اؤنا تابع اؤلان ایالت‌لره حاکم اۆلدوغو دۆرده، اهالی کی بو حاکمیت ایلن مخالف ایدیلر، حروفی‌لیک بایراغې آلتیندا، حکومتین منافعینی مدافعه ائدەن تشکیلات‌لارلا مبارزه ائدیردیلر.

بو مسلک، ۸-ینجی عصرین سونوندا استرآباد شهرینده فضل‌الله نعیمی تبریزی طرفیندن وجوده گلدی. فضل‌الله اؤزۆنۆ عالمین نجات وئریجیسی بیلیردی کی گویا تانرې و کائناتین (بۆتۆن وارلیق‌لارېن) جوهر و حقیقتی اؤنون وجودوندا تظاهر ائتمیش دیر. اؤ، ادعا ائدیردی کی «حروفات» واسطه‌سیله کائناتین سرلرینی افاده ائدیر.

فضل‌الله نعیمی‌نین عقیده‌سینی قبول ائتمک اۆچۆن اؤرتا شرقده، خصوصیه آذربایجان‌دا، ال وئریشلی سیاسی-اجتماعی شرایط موجود ایدی. بئله کی اؤنون قیامېندان سؤنرا، آذربایجان و اؤنون اطرافیندا کی منطقه‌لرده

ساي- سېز آداملار اونا هاوادار اولوب و ۹-ونجو عصرين بيرينجى يارېسېندا ايران دا، عراق عجمده، آذربايجان و تۆركيهده، دولت لر و حكومتلر قارشى حركتلرله باغلى اولاراق، اجتماعى چاخشاملار، اغتشاشلار و حركات سبب اولدو.

فضل الله نعيمى نين مركزى (رهبر) تشكىلاتى آذربايجانين شىروان شهرينده يئرلشirdى. ۷۹۵-ينجى (هـ.) ايلده حروفى لرين ميران شاها قارشى توره تدىكلرى ترور عملياتىندان سونرا، ميران شاهين فرمانى ايله فضل الله نعيمى شىروان دان ناخچوانا گتيردىلر و آلېنجا قالاسېندا اولدوردولر . . .
اونون نعيمى اھالىنى قورخوتماق و اۇنلار عېرت درسى وئرمك اوچۇن شهرده گزديردىلر و شدتلى صورتده حروفى لرى تعقيب اتتىلر. چۇنكى بو مسلك كسبه، صنعتكار، شهر اھالىسى و آيدېن فكرلى آداملارېن آراسېندا سرعتله يايىلېردى.

ادبيات و اينجه صنعت، منطقه لرده كى دولت آداملارې ايله مبارزهده حروفيه حركاتى نين سچگين قروپ (دسته) لارېنېن سلاحي ايدى. بو سبب دن دير كى هم شاعرلرين، رساملارېن و آرتيستلرين تربيتينه آرتېق راق دقت ائديلirdى، همده خلق كۆتله لرينى عصيانا تحريك و تشويق ائتمك و معتقد مريد توپلاماق اوچۇن ادبيات و اينجه صنعت ال وئريشلى واسطه لردن بيرى ايدى. حروفيه حركاتينا اينانان لارېن ان قابارېق خصوصيتلريندن بيرى بوندان عبارت ايدى كى اۇنلار زمانه نين سنتلرى نين ضدينه اولاراق آذربايجان خلقى نين ديلينده، شعرلر، منظوملر (پوئمالار)، قهرمان لېق نغمه لرى

و هیجانلاندېرېچې یازبالارلا اؤز عقیدهلرینی تبلیغ ائتمکله یاناشې آذربایجانېن تۆرکجه دیلینی «اؤز مسلک‌لری‌نین مقدس دیلی، اسلام‌دا عرب دیلینه برابەر» سایېردېلار.

حروفیه حرکتی‌نین مرکزی، یعنی آذربایجان‌دا گؤرکملی شاعرلر نسیمی، حبیبی، شاه ختایی، کشوری تبریزی، طفیلی اردییلی و باشقالارې بو مسلکین تبلیغی اؤچون فداکارلېق گؤستریدلر.

نسیمی، آذربایجانېن تانېنمېش شهید شاعری و حروفیه مسلک‌ی‌نین ان معروف باش‌چې‌لارېندان بیرى، شعرى‌لری‌نین چۇخونو حروفى‌لیک مرامى و آمال‌لاری‌نین تبلیغینه حصر ائتمیش و ۱۴۱۷ م. یینجی ایلده، «ملک المؤید سیف الدین»-ین امری ایله حلب شهرینده بدن‌ی‌نین دریسی سویولاراق اؤلدورۇلۇب دور.

نسیمی‌نین عاشقانه و هیجانلاندېرېچې دییشمه‌لری سئوگی‌دن، شریعت احکامینا اینامېندان، آزادلېق تمایلۇندن، امید و مبارزه عنصرلری ایله مایالانمېشدېر. اۇنون اثرلری‌نین قهرمان‌لارې فداکار انسان اولاراق باشېنې وحدت میدانى‌نین چوگانېنا چئویره‌رک، اؤزۇنۇن کامل لشمه‌سینی فداکارجاسېنا جانبندان کئچمه‌سین ده گؤرۇر.

نسیمی و حروفیه حرکتی‌نین باشقا سؤز اوستالارې‌نین شعرلری‌نین مضمون‌لارې، آذربایجان اراضی‌سینده، مرکزی، مقتدر و قدرتلى شاه اسماعیل ختایی‌نین حکومتی‌نین بایراغې دالغالاندېقدان سونرا، بؤیۇک ادبی دیرچلېش‌دن، آذربایجانېن مدنیت و سیویلېزاسیاسی (تمدن) تبریز شهرینده

فورمالاشىپ، انتظاملى سىجىيە آلدېقدان سۇنرا تشكىل و تكامل تاپاراق، حمايت ائدىلدى.

ختايى، اۆز نوبەسىنىدە «باطنى و عرفانى شەرىن» آذربايجان ادبياتىندا بۇيۇك بانېسى و دوام ائتدېرىجىسى دېر، او فطرى شاعرىلىك استعدادىنا مالىك اولماقلا، آذربايجان ادبيات تارىخىنىدە يۇكسك مقامدا صاحبدېر.

ختايى نىن اساس مقصدى شەردن، دشمنلەر قارشى سلاح كىمى استفاده ائتمىكلە، جوان صفوى حكومتىنى محكم لندىرەك ايدى. بونا گۆرە دېر كى، آذربايجان خلقى نىن معين قروپلارى هله ده اونون شەرلىرى نىن چۇخونو مىلى شەار اولاراق ازبىردىرلر . . .

ختايى اۆز زمانەسىنىدە، حروفىە مىسلىكى نىن شاخەلرىندىن اولان «حقيقت» آدلى فرقه نىن باشچىسى ايدى كى ايندى دە آذربايجان نىن بىر چۇخ شەرلىرىندە «اهل حق» و «گۇران» عنوانلارې ايلن مريد و معتقدلىرى واردېر. گۇرانلارېن عقىدەسىنچە، «شاه ختايى» امام على (ع)، فضل الله نعيمى و سلطان اسحاق دان سۇنرا دۇردۇنچۇ صورت دېر كى دۇنيادا ظاهراً اولوب دور. ختايى قەرمان لېق شەرلىرىندە فضل الله و حروفىە حرىكاتى نىن باشقا بۇيۇك شخصىتلىرىندىن الهام آلبىدېر و شەرلىرى نىن مضمونو جنگ اورلىك، ايگىدلىك، سئوگى و محبتلرله يۇغرولموش دور.

«ختايى» نىن ان بۇيۇك رولو و خدمتى، آذربايجان ادبياتى نىن تارىخى گنديشىنىدە، حىببى، كشورى، طفىلى و فضولى كىمى مىثل سىز ادبى

استعدادلارېن تربيتى دىر كى اۋز مىلى ادبياتلارېنې افادەلىلىك و كامىل ليگىن ان يۆكسك ذىروەلرېنە يۆتلتىمىش لىر.

حبىبى، سادە و آنالاشېقلى غزلىن اوستادى اۇلاراق «گۆزل ليك و سئوگى» موضوعلارېنې قلمە المېشدىر، اۋنون غزل لىرى يۆز ايللىر بۇيۇنجا بۇيۇك آذربايجان شاعرلىرى طرفىندىن «استقبال» و «تضمين» اۋلونموش دور. ختاى ساراينىداكى شاعرلىرىن سلطانى اۋلان حبىبى نىن عاشقانه دىيشمەلرېندە- هيجانلى حياتېن آلولى نفسى و عشقىن حرارتى دويولور. حبىبى وارلىغېن داخلى عالمينە (گۆنۆن دۇياسينا) عائد ايشلتىدىگى عبارت لىرە باخمايلاق، اۋ، آلولى و صميمى عاشىق اۋرەگى نىن دۇيۇنتۇلرىنى دۇيوى سئوگى و حس اۋلوناجاق درجەدە عالم شمول محبت اساسىندا سادە شعر قلىب لىرىندە افادە ائدىر.

۳-۳. كشورى تبرىزى

كشورى تبرىزى نىن دە ديوانى، حبىبى كىمى مداحلىق شعرلىرىندىن اوزاق دېر. كئچمىش عصرلىرىن و رسمى كىتابلار، تذکرەلر و ساراي لارلا باغلى بىوقرافىالاردا اۋنون آدې چكىلمىر. اۋ شعرىندە اۋزۇنۆن گۆزەل گۆيچك سئوگى لىسىنىن اۋزۇنۆن تصويرائىدەرك اۋنو دۇيوى لذت لىردىن استفادە ائتمىگە چاغرىر. كشورى نىن شعرلىرىندە «تغزل» اۋنون يارادېجى لىغې نىن آشاغى و ضعيف پلەلرىنى تشكىل ائدىر و آغالېغا اعتراض و آزادلېغا تمايل قابارلىق شكىلدە اۋزۇنۆن گۆستىرىر.

واقف، گۆزەللىك و حقيقت شاعرى ❖ ۴۷

«رياکار» زاهدلرين ظاهرى ترک دُنيالېغېندان نفرت ائتمک، هم اؤز «جانېني» و همده «هر ايکى دنيانې» و «شيخ صنعان وارى» ايمان و عقیدهنى معشوقه يه فدا ائتمک، کشورى نين شعرلرى نين اساس مضمون لارېني تشکيل ائتدير.

۴-۳. طفیلی اردبیلی

طفیلی اردبیلی ده آذربایجان کلاسیک ادبیاتې نین گۆرکملی شخصیت لریندن اولوب، شاه ختایی نین عظمتلی ادبی-مدنی حرکاتې نېن یئتیرمه لریندن و حروفیه مسلکی نین معروف نماینده لریندن دیر. او معنوی خرافی اسارتیه قارشى و حروفیه مرامی نین انسان پرور ایده آللارې نین تبلیغینده، شعردن سلاح کیمی استفاده ائتدی.

طفیلی آردبېل اؤلاراق، شاه ختایی نى، امام على^(ع) نى و فضل الله نعيمی نین انسانی صفت لرینی ستایش ائدير. بو اؤچ شخصیتی بیر نفر حساب ائدير. او اؤز مدحیه لرینده خلقی سفر بر اولوب، حروفیه حرکاتې نین مقصدلرینه عمل ائتمگه چاغرېر. اؤز «مربع» لری نین بیرینده آند ایچیر کی اگر نسیمی کیمی دریسی سؤیولسادا، زندان لاردا بدنین شاققا- شاققا ائتسه لرده بو یولدان دؤنن دگیل دیر.

۵-۳. حكيم فضولى

شاھ اسماعيل ختايى نين ادبى - مدنى حرکاتى ايله باغلى مولانا محمد بن سليمان بياتلو «فضولى تخلص» بۆتۈن مدنى شخصيتلردن چۈخ مىلى مدنيت و ادبياتا خدمت اتتىدى.

شاھ ختايى نين عمرۇ باشا چاتدېقدان سۇنرا، فضولى ۲۴ ياشېندا ايكن كۈچگۈن بىر قىيىلە ايچىندە بغداد اطرافى ولايتلىرى نين بىرىندە ياشايدى. زمانە نين ادبى دىللىرىنى يعنى فارس و عربىنى مكمىل بىلىردى و شاھ ختايى نين ادبى دىرچلىشىندىن سۇنرا ادبيات خادىملىرىنى مشايىت ائىدىردى. شاھ تھماسب دۇرۇندە يارادېچىلىغى او درجە تكامل تاپدى كى شاعىرلىكدە و اوچ دىلدە يازىپ ياراتماغا قادىرتام باجاربىلى بىر مۇلف - شاعر كىمى معروف اولوب، قېسسا مدتدە گىنىش جىملى تۇركجە ديوان ترتيب اتتىدى و بىللەلىكلە ائلە بىر ادبى مكتىبين بىنۇورەسىنى قۇيدوكى آذربايجان شعرى ۲۰ يىنجى عصرىن اوللىرىنە قەدەر اونون شدتلى تاثير و اقتدارى آلتېندا ايدى، قۇشدوغو غزللىر واسطەسىلە چۈخ سايبىلى غزلچى شاعرلىر اوندىن تاثير آلدېلار و معاصر دۇردە اونون اثرلىرىندىن اۇپرالار، سىنما فىلىملىرى و پىئىسلىردە آردېچىل اولاراق استفادە ائىدىلدى. بىز آذربايجان تۇركلىرىنە «اىلياد و اوديسە»، «حافظ ديوانى»، «پوشكىن شعرى» و «گوتە» اثرلىرى كىمى يادگار وجودە گتىردى كى «كور اوغلو داستانى» كىمى ان چۈخ اوخونولان اثرلىرىدۇر.

فضولى نين غزللىرى ھلە ساغلىغېندا ال بە ال و يورد بە يورد گزەر ك جىغرافىيى و مىلى سرحدلىرى آشدى.

«عشق» فضولى غزل لىرىنن ان اساسلى موضوعدور، البته بو جسمانى و فردى جىنسى دويغودان عبارت دگيل دير، بلكه درين بشرى، مدنى، اجتماعى و صوفيانه ماهئته مالک دير.

فضولى نين عقیده سينجه، عشق انسانين يئتگين ليک و گۆزەل ليگينه پرستش، حياتى سئومک، دايم ياشايشي و حياتى تظاهىرلى و انسانى سئومک، وفادارلىق و دۆزگۆنلۆك دن باشقا بير شئى اولاييلمز.

اگر فضولى نين صوفيانه شعرلرينده «الاهى - ملكوتى عشق»، «آخرت سعادتى» و سمبوليزم حاکم ديرسه، اونون رئاليستىك شعرلرينده، غزل لىرى نين اساس موضوع و مضمونو سعادتە حسرت و اۆزۆلۆ اولۆ دنيوى - فلسفى عشقه باغلى حيات دير. و فضولى تغزلۆنۆن قهرمان لارې جانلې - گرچک (رئال) انسان تصويرلرينه حصر ائديلميش دير: «آهو گۆزلۆ، بلور بدنلى، قارا تئلى، لاله اۆزلۆ، عطير قوخولو و سرو قدلى».

حتى بئله بير گۆزەل ليک مجسمه سيله «عشق بازلبغا» مشغول اولماق، خرافاتا بويون اگمكدن اۆستۆن دۆر، البته ساده آنلاشبقلى جسارتلى، رمز، مجاز و كنايه دن كنار، جمله لر و عبارت لر ايلن.

فضولى نين اثرلرينده «عشق موضوعو» اؤ قدەر گئنيش و مركب دير كى فضولى شناس لارېن چۆخونو سرسم لديب يانلبشلبغا يووالاتمېشدېر. بعضى لر اونو «مولوى مسلک صوفى» و بير عده ده اونون «دويغولارېنى شخصى» قلمه وئرميش و بئله دۆشۆنمۆشلىرى، عاشقانه شعرلرينى ملك الشعرا حبيبي نين قېزېنا (كى گويا اؤنا عاشق ايميش) خطاب سؤيله ميش دير. بو تماميله يانلبش دېر،

اۇنلار سەھو ئاڭدیرلر، «فضولی نین تغزلو» فئودال جمعیتینین آدمالاری نین اۆره ک دۆیۆتۆلری دیر کی انسانن آزادلیغی و دۆشۆنجه نین آزادلیغی اۆچۆن، بۆتۆن جهت لری ایله تظاهر ائدیر و یاشاییشین ایستی سینی و عطرینی اۆخوجونون دماغ شریفینه چاتدیر.

پوچ فکرلر تبلیغ ائدن لری و یالان وعد وئرن لری قارقیشلاپیر، یالانچی زاهدلر و اۇنلارین وعظا لرینه نفرتله یاناشیر و فیریلداقچی حاکم لری و خرافات خادملرینی خلقه ائتدیکلری سای سیز- حساب سیز ظلم لره گۆره تنقید ائدیر و خلقین معنوی- مادی منافی اۆچۆن مدافعه جبهه سی نین اۇن جرگه لرینده دۆیۆش ره ک دئییر: *ای فضولی! اۇدلارا یانسین بساط سلطنت!*

فضولی غیر تغزلی اثرلرینده هابئله مظلوم خلقی مدافعه ائتمکده ده «رئال موقع» توتور. «شکایت نامه» سی عذاب- اذیت چکمیش کوتله لرین قېشقیر تېسېدېر کی، عدالت سیزلیکدن، ظلم لردن و خان لارین، ارباب لارین، رحم سیز دولت مأمورلاری نین الیندن جانا گلیمیشلر.

فلسفی- عرفانی (تئوسوفیک) مضمون لاردا فضولی تغزلونو، مایالاندیرمیشلار. بونا گۆره و «گئنیش احاطه لی مرکب عشقی» اۆچۆن بعضی عالم لر اۇنو حقلی اۇلاراق «متفکر عاشق» آدلاندیرېپ لار.

فضولی نین ادبی- بدیعی یارادېچی لېغی، هم آذربایجان ادبیات تاریخینده، هم ده اورتا و یاخین شرق و آسیا قطعه سینده یاشایان تۆرک دیللی خلق لری ن ادبیات تاریخینده، دۆنۆش نقطه سی حساب اولونور. اۇ زمانه نین طلب لرینه دقت

اۋدىن، دۇرۇن مدنى - ادبى و اجتماعى - انسانى مسئلەلرىنى ادبياتتا گىتىرن و عصرى نىن شرايطىنى اۇز قلمى ايله انعكاس ائتىدىن بىرىنچى شاعردىر. فضولى، آذربايجان تارىخ ادبياتىندا، لىرىك - موزىكال (تغزلى - غنايى) شعرىن بايراق دارىدېر، واقف يارادېچىلىغىندا درىندىن تاثير گۇستىرىدېر. فضولى نىن اۇلۇمۇندىن تا واقفىن ادبيات عالمىنه گلىشىنه قىدەر، آذربايجان ادبياتىندا مېم حادثە باش وئرمەمىشىدىر، بونا گۇرە بو دۇرۇ ھمىن ادبياتدا دورغون لوق، مرحلەسى آدلاندىرماق اۇلار.

۶-۳. عليجان قوسى تىرىزى

فضولى دن سۇنراكى شاعرلرىن ھامىسى اۋنون مقلد و مريدى اۇلوبلار، اۇ جملە دن قوسى تىرىزى دە، محض فضولى دن تقليد ائتمىش دىر. تذکرەچىلر بو موضوع حاققىندا آردېچىل مباحثە ائدىلر و فضولى دن تقليد ائتمەگىن سرلرىنى آشكارلامىشلار.

قوسى شكائىت لىر و گلایەلر شاعرى دىر، اۋنون شكائىت موضوعلو شعەرلىرى سادە و صمىمى و «غربت» قۇخولودور. معلومدوركى، بىرىنچى شاه عباس دان سۇنرا، تشيع مذهبى نىن ھەر طرفلى يايىلماسى و حروفىيە حرکاتى نېن گىزلى تشكىلاتى نىن داغىلماسىندان سۇنرا، حروفى لىك، تھلکە ايله قارشى لاشدى، حروفى ادبىلر و شاعرلىرى تجرىد اۋلوندولار و غير حروفى ادبياتچىلار زوراکىلېقلا مجبورى اۇلاراق اصفهانا و باشقا غرىب ايالتلرە كۆچۇرۇلدۇلر.

کوچنلر آراسېندا، قوسی تبریزی، صائب تبریزی و تأثیر تبریزی ده وار ایدیلرکی، هر اوچو فضولی نین مقلد و مریدی ایدیلر. بونلار دورغونلوق (= فترت) دُورؤنؤن ان معروف شاعرلریندن دیرلر.

۷-۳. تأثیر تبریزی

تأثیرین اثرلری ده شکایت، ناکاملېق و آخ وای ایلن دُولودور، اؤ بیر یاندان وفاسېز و ظالم گؤزهل لری وصف ائتمکله، باشقا یاندان سرو بویلو، گؤل یاناخلې گؤیچکلری تعریف ائدیپ اؤنلاردان شکایت ائدیرکی محبت سیز و عاشیقین آجېناجالې حالېندان بی خبر دیرلر.

تأثیر شعرلری نین مهم خصوصیتی بوندان عبارت دیرکی اؤ انسان و طبیعت ده کی گؤزهل لیکلری ساده و آچېق طرزده افاده ائدیر و تصوف دن اوزاق دیر.

۸-۳. مسیحی تبریزی

فترت دُورؤنؤن ادبی نماینده لری نین اثرلرینده رئالیزمه تمايل، واقف رئالیزمی و ادبی مکتبی نین اساس لارېنې تشکیل ائدیر. واقف فترت دُورؤنؤن ادبی اثرلری نین هامېسېنا دَقّت یئتیرمیش دیر، مثلاً مسیحی نین «ورقا و گلشاه» مثنوی سیندن کی شاه صفی یه اتحاف ائدیلیمیش دیر، الهام آلب دیر.

مسیحی بو اثرینده، تصویر یاراتماقد، قهرمان لارېن صورتینی تصویر ائتمکده، دیل و افاده اوسلوب لارېندا، بلاواسطه فضولیدن تأثیر آلمېشدېر.

واقف، گۆزه‌للیک و حقیقت شاعری ❖ ۵۳

فترت دُورۆنۆن دوامی و سونوندا، واقف رئالیزمی، آذربایجان ادبیاتی نېن
زنگین و دولغون خزینه‌سیندن غیدالانېب و واقفین ادبیات ساحه‌سینه قدم
قویماغې ایلن «فترت» مرحله‌سی باشا چاتېبدېر.

۴- واقف و فولکلور

واقف، آذربایجانین شفاهی و یازیلدی دیلینی بیرلشدیردی، اؤنون ادبی یارادبجیلدی شفاهی ادبیات و آذربایجان فولکلورو ایله سیخ باغلیدیر، واقفین ادبی ارثی نین بو ایکی قولونو یعنی کلاسیک و خلق شعرینی عضوی شکلده بیرلشدیرمه سی ایله، خلق شعر ی یازیلدی ادبیاتیمیزدا، اؤستؤنلؤک قازانیر، آپاربجی موقعه کئچیر.

آذربایجانین رسمی کلاسیک ادبیاتی ایله یاناشی کامل لشن شفاهی ادبیاتی نین تاریخی چؤخ قدیم دیر و اؤز دولغونلوق و زنگین لیگی ایله قونشو خلق لرین ادبیاتیندا دریندن تأثیر گؤستمیشدیر.

۱- ۴. عاشیق ادبیاتی

آذربایجانین خلق ادبیاتی نین تکاملو، کلاسیک شعر کیمی، شاه اسماعیل ختایی نین «ادی دیرچلیشی» ایله باغلیدیر. شاه ختایی دورؤندن سؤنرا، عاشیق لار، گزه گن چالقې چیلار، خلق آرتیستلری و شفاهی ادبیاتین نماینده لری، هابئله شاعرلر سارای طرفیندن تشویق ائدیلدیردیلر. شاه ختایی ادبی یارادبجیلقد عاشیق شعریندن الهام آلبردی و یئرلی موسیقی چیلری اؤز اطرافینا تویلا یاراق عاشقانه و هجا وزنلی شعرلر قوشماق ایلن «حروفی لیک» مرامینی تبلیغ ائدیردی.

ختايى نېن دۇرۇندە امام على ^(ع) و باشقا حرمتلى دىن خادملرىنى «ستايىش» ائتمىك، مختلف شعر فورمالارېندىن اۆستۆن توتولوردى، بو عصرده «اوستادنامە» لىرىن چۆخو، امام على ^(ع) و ختايى نېن «ستايىشىنە» حصر ائدىلمىشىدىر. «ساز» ھاۋالارېنا مەخسۇس، خەسۇسى شعر قىلىبلرى و خىطاطلىق اُسۇلۇبلارې «شاھ ختايى» آدېلا و جودا گلدى و حتى عروض وزنلى ختايى فۇرمالى شعر عاشىق ادبىياتېنا داخل اۆلدو. كلاسىك عاشىق شعرى نېن، شاھ ختايى ادبى حرىكاتې نېن گۇركملى نەمىندەلرى، عاشىق قربانى و عاشىق امانى دن عبارت دىر.

۲- ۴. عاشىق قربانى

عاشىق قربانى، ھجايى شعرلىرىندە، زمانە سىندىن شكايىت ائدىر، ظالم لىر و بىگانەلرىن، ظلمو آلتېندا ياشايان خلىقن، غم، درد و محنتلرىنى، گلە جىگە امىدلە ياشاماغى آشېلاماقلا، افادە ائدىر. اۆ شاھ ختايى حكومتى نېن اقىصادى شرايطىنى دە تنقىد ائدىر.

عاشىق قربانى، سۆز صنعتكارلېغېندا شعرىن بىزە كلىمە قايدالارېندا چۆخ صنعتلى شعر فېنىندە يئنى لىكلرى ايله واقفىن لىرىك ارثىنە بلاواسطە تاثير ائتمىشىدىر.

۳- ۴. عاشىق امانى

عاشىق امانى دە ختايى سارايېنا ان ياخېن آداملاردان ايدى، ختايى نې دۆيۆشلىردە مشايىت و حروفىيەنى تبلىغ ائتمىشىدىر. اۆنون ھجا وزنلى شعرلىرى

شاه ختایی قوشمالارې نېن اُسلوبوندا و عاشیق شعرى نین ایشلک نوعلرینده لیریک و اینجه لیریک مضمونلو ساده و آخېچې قلیبلرده دیرلر. شعرى نین موضوع لارې نې «طبیعت» و خلْقین یاشایېشېندان آلان عاشیق امانی، یئنی لیک چیلیگی ایله آذربایجان خلْقی نین شفاهی ادبیاتې نېن عاشیق شعرینه عائد بۆلمه سی نین ان بۆیۆک نماینده لریندن دیر.

۴-۴. عاشیق منظومه لری

عاشیق شعرى آذربایجانېن شفاهی ادبیاتې نېن مهم شاخه لریندن اولاراق، «شاه ختایی ادبی حرکتې نېن» تۆرمه سیدیر کی «ادبی دورغونلوق دُورؤنده» اؤز تکاملؤنؤن ذیروه سینه چاتمېشدېر. حمید آراسلې نېن فکرىنجه: «۱۷-ینجی عصر، آذربایجان عاشیق شعرى نین ان پارلاق دُورؤدؤر.» عاشیق منظومه لری نین ان مشهورلارېندان اولان «داستان» (اؤنلارېن دده قورقود کتابېندا کی ایلکین فورمالارېنا دَقّت ائتمه لی بیک) بو دُورؤن محصولو اولدوغونو قید ائتمک لازم دیر.

آذربایجان منظومه لری (داستان لارې) ایکی نوع دان عبارتدیر: ۱- ایگی دلیک و قهرمان لېق منظومه لری (داستان لارې). ۲- عاشقانه رمانتیک منظومه لر (محبت داستان لارې).

قهرمان لېق داستان لارې نېن تانېنمېش و ان معروف لارېندن بیری «کؤر اوغلو» حماسه (اپوس) سی دیر کی بوگونه قدهر ۱۷ نوعو تاپېلېب و یازپیا آلېنمېشدېر. کؤر اوغلو خلْق ایچیندن چېخمېش بیر قهرمان اولاراق، زمانه سی نین عدالت سیزلیکلرینه قارشې عصیان ائتمېشدیر.

امّا بو دۇردە يارادېلمېش منظومەلرین چۇخو، محبت داستانلارېندان (عاشقانه- رومانتيك منظومەلردن) عبارت دیر کی اۇنلارېن قهرمانلارېنېن چۇخو صميمی عاشق اۇلاراق، معشوق يۇلۇندا، ان گۆجلۇ و مقتدر دشمنلە قارشېلاشېب، اۇنلارلا دۇيۇشۇب، معشوقە چاتماق اۇچۇن بۇتۇن مانعەلرلە فداكار جاسېنا، چارېشېرلار.

محبت داستانلارېنېن ان معروفلارې آشاغېداكىلاردان عبارت دیر: اصلی و کرم، عاشق غریب، نوروز، عباس و گۆلگز و اۇنلار باشقا داستانلار. بۇتۇن بو داستان (منظومە)لارېن اهميت لیسى، آذربایجان خلقى نین اجتماعى حیات تاریخىنى انعکاس ائتدیرن «عباس و گۆلگز» داستانى دیر کی بو دۇردە يارادېلمېدېر.

بو داستاندا (منظومەدە) عباس توفارقانلې و گۆلگز پرى بىر- بىرىنە عاشق دیرلر. امّا شاه عباس کىمى گۆجلۇ و بۇيۇک رقيب و حریف اۇنلارېن عشقىنە مانع و گۆلگزین گۆزەللىگىنە وورغون اۇلوب، فرمان وئیرر گۆلگزى حرمسرایه آپارسېنلار. عاشیق عباس، داستانېن قهرمانى شاه عباس ایلن قارشې- قارشېيا دورارق هیجانلې- يانېقلى شعرلری ایلە، آذربایجان خلقى نین شاه عباسا بسلەدیگى درین نفرتىنى و کسگین اعتراضې افادە ائدیر.

محبت داستانلارېندا (عاشقانه- رمانتيك منظومەلردە) قهرمانا مانعەچىلىك تۇرەدنلرین چۇخو دولتىن نۇکرلری، ال آلتېلارې، خادملىرى و فئوداللارا يالتاق لېق ائدن قروپلاردان عبارت دیر کی منظومە (داستانلارېن) لرین قهرمانلارې کىمى «ساز- سۆز» اوستادلارېدېرلار کی منظومە نین متنى و

بینۆره سی اۇنلارېن صنعتکارلېغې اساسېندا قورولور. آذربايجان ناغېل لارېندا (افسانه لرينده) اۇلدوغو کیمی بعضاً خارق العاده و ضیالی قوه لر منظومه لرین قهرمان لارېنا یاردېم ائده رک اۇنلارې اۇلۇمدن قورتارېرلار. قهرمان لار اۇز سئوگی لیلرینه چاتماق و «وصال باده سینی» ایچمک اۇچۇن دؤیۆشورلر، قهرمان لارېن اساس حرکت وئریجی عامل لری صنعتدن، سازدان و سؤزدن عبارت دیر.

واقف بو منظومه لر، عاشیق صنعتی قهرمان لارېن عشق لری و عاشیق لارېن چالغې آلتلری اۇلان «ساز» ایله تانېش ایدی، بونلارلا یاناشی، آذربايجان فولکلورونون باشقا نوعلریندن ده اۇز ادبی- بدیعی یارادېجېلېغېندا یارارلانمېش دیر. تصادفی دگیل دیر کی عاشیق لار اۇنون ادبی ارثی و شعرلریندن الهام آلمېش آدی و یاشایېشی عاشیق داستان لارېندا، ناغېل لاردا، ماهنې لاردا و ضرب المثل لرده ابدی لشدیریلمیش دیر.

واقفین نغمه لرینی هله ده آذربايجانېن اوجقار کندلرینده کی توی لاردا و شن لیک مجلس لرینده ترنم ائدیرلر، چۇبان لار توتکلرینده چالېر، جوان قېزلار آی ایشېغېندا زمزمه ائدیر، جوان بیگیلر تزه گلین لره اۇخویور، آنالار، اۇز بالالارېنې اۇنلارلا اۇخشاېیر دنیا گۆرمۆش کیشی لر، قۇجا قارې لار و قیيله لرین باش بیلن لری، بو ضرب المثلی دؤنه- دؤنه دیله گتیریرلر: هر اۇخویان ملا پناه اۇلماز.

۵-۴. محمد حسین خان مشتاق

آذربایجان خانلیق لاریندا، قاجارلارین حکومتی نین باشلانغیچیندا، شاعرلر و ادیبلر خانلار طرفیندن حمایت اولونوردولار و خانلیق لارین سارای لارینداکی آداملار ملی دیلین تکاملونو اؤزلری نین ان مهم وظیفه لریندن بیرى حساب ائدیردیلر. بو خانلیق لار آذربایجان ادبیات تاریخینده چوخ مهم رول اویناییب لار. بعضی خانلار لارین حاکم لر و امیرلری شاعر و ادیب ایدیلر. شکی خانلیغی نین حاکمی محمد حسین مشتاق کیمی بو دورون ان استعدادلی شاعری، واقفین معاصر و یولداشی ایدی. «ملا ولی ودادی» محمد حسین خانین اولومو مناسبتی ایله بیر «مصیبت نامه» قلمه آلمیش و اونو، مثل سیز حاکم، غابلی، تدبیرلی، دیندار و عدالتلی آدم کیمی وصف ائتمیش کی خلقی شاهلارین عذاب، اذیت و ظلموندن قورتاردی.

محمد حسین خان مشتاق رسمی شعردن باشقا، همده شفاهی ادبیاتدان الهام آلاق بوگون ده عاشیق لارین دیلی نین ازیری اولان قوشمالار و اینجه گرایلی لار قوشموشدور.

۵- واقفین رئالیزمی و شعرلری نین تصنیفات

واقفین بیر شاعر کیمی یئتیشدیگی دۆرده اۆچ شاعرلیک مکتبی وارایدی:
الف- آذربایجان ادبیاتی نین کلاسیک شعر قلیبلریندن استفاده ائدن فضولینی سؤنلرین مکتبی، بو مکتبین نمایندهلری نین شعرلری فارسجا-عربجه «ترکیب» و «تعبیر» لرله دولو اولوب و آذربایجان ادبیاتی نین تاریخی تکامل مرحله لریندن بیر سیپیلان «فترت (دورغونلوق) مرحله سی نین» دوام ائتدیریجی شاعرلری، محمد حسن خان مشتاق، آقا باقر شیروانی، ملا ولی و دادی، زاری آغجا یازیلې و سایره دن عبارت دیر.

ب- ایکینجی مکتب «هجویه چی» شاعرلرین یارادېجېلې دېر کی اؤنلارېن باشلېجا نماینده سی «مهدی بیگ شقاقی» ایدی. او ۱۲۱۴ سینجی ایلده، سؤرگۆن حیاتی یاشارکن وفات ائتدی و مملکتیمیزین اؤزدن ایراق «رسمی» ادیبلری نین دیلینجه دئسک «چوخ سېرتېخ و بی مبالات اولوب و حرمت لی آداملاری هجولری ایله اینجیدیدیر.»

ج- اؤچۆنجۆسۆ واقفین ادبی مکتبی دیر، بو مکتبین اساس خصوصیتی «شعر اُسلوبونون یئنی لیگیندن» عبارت ایدی کی یوخارېداکی مکتبلرین هر ایکیسینی دریندن تأثیر لندیره رک، عموم خلق رغبتینی قازانمېشدېر. حتی مهدی بیگ کیمی شاعرلری اؤزۆنه جذب ائدیب، واقف اُسلوبوندا یارادېجېلېغا وادار ائتمېشدیر.

سادە، خلىق دىلىندىن الھام آلان، ھىجا وزىلى بو شعر مەكتىبى، ختايى ادبى
ھىركاتى نىن تورەمەسى اولاراق فەرت دۇرۇنۇ ياشايان عىروض وزىلى شەئرى
سېخېشەن ھىراق، عاشىق لار و گىزەرىگى چالغې چىلارېن دىلىندە كامىل لىك
ذىروھلەرىنە اوجالدى.

بو مەكتىبىن ان مەھىم شەخسىتلىرى: نىي، شەكىلى راضى، رافە، آغجاسېز
اوغلو پىرى و قاراداغلې ەلى ايدى كى ادبى يارادېچىلېقىدا باياتى، قوشايارپاق،
تەنجىس و سائەردەن يارارلاناراق، سۇزۇن حەقىقى مەناسېندا «واقف رىئاليزمى» نىن
لىاقتلى گۇدۇك چۆلىرى ايدىلر. بو شاعىرلر واقفى دۇنە- دۇنە ستايش ائدىب و
اۇز ائىرلىرى ايلن گۇستەردىلر كى اۇنون شەئىرلىرى نە قەدەر خلىق طەرفىندەن
الْقېشلا نېبىدېر.

مثلاً واقفىن مەاصىرى، كلىبىرلى عاشىق ەلى قاراجاداغلې ، ملا پناھى بئلە
تەرىف ائدىب دىر:

بو گوھر سۇزلىرىن، اى عالىجىناب!
تمام عاشىقلىرىن سەمىنە گلەمىش.
فصاحتە، بلاغتە سىنن تەك،
اينانماكى، روى زمىنە گلەمىش.

بو عىصرە شاعىرلىرىن خانىسەن،
مۇدەسسە بىر ابر سەن، يەنى سەن،
ەلمىن مەدنىسەن، گوھر كانىسەن.

❖ ۶۲ واقفین رئالیزمی و شعرلرینین تصنیفاتې

اۋشیدنلر سۆزۆن دمنه گلیمیش،

عاشق اولدوم بیر قامتی رعنايه،

اۋنو سؤدیم، جانیم دۆشدۆ بلایه.

والله، بالله، سن دۆشدۆگۆن سودایه،

آرتېق من فقیرین سربنه گلیمیش.

علی چکر گنجه- گۆندۆز آه و زار،

کسیلدى مدارا، گئتدى اختیار،

واقف اولسون بو معنادان خبردار،

مدینه کویونا، سکینه گلیمیش . . .

۶- کئچمیشه کؤکلؤ باغلی لبق

واقف، سؤزؤن حقیقتی معناسیندا، آذربایجان ادبیاتی نین تاریخینه باغلی دېر و گؤسترديگیمیز کیمی نسیمی، حبیبی، کشوری، ختایی، فضولی دن و آذربایجانین شفاهی خلق ادبیاتیندان تأثیر آلب ادبیات تاریخی میزین تکاملونون منطقی محصولودور.

یئری گلمیشکن قید ائتمک لازمدیرکی بو دؤرده ائله شاعرلرده وار ایدی کی اؤنلارین «مهم ادبی امگی» نظیره چیلیک، تضمین و تقلیددن عبارت اولوب و کئچمیش شاعرلرین اثرلری نین مضمونونو، موضوع لارینې و قلیبلرینی تکرار ائدیردیلر و آذربایجانین صنعت و ادبی پروسیسینده مهم رؤل اؤینامامېشلار.

واقف، آذربایجان ادبیات تاریخی نین کلاسیک دؤرونون بئلنچی مرحله سینده، ائله بیر یئنی ادبی مکتبین قاپی لارینې ادیب و شاعرلرین اؤزونه آچدی کی اؤ مکتبده حیاتین ایستی نفسی و طراوتلی حرارتی دویولوردو. آراز داداش زاده (محمد عارفین اؤغلو) واقفین تاریخی - ادبی رؤلونو، ترکمن خلقی نین بؤیوک شاعری «مختومقلی فراغی» نین خدمت لری ایله مقایسه ائده رک یازېر: «هر ایکی شاعر «فورما و قالب» نظر دن ادبیاتدا انقلاب وجودا گتیردیلر. اؤنلار کلاسیک شعر دن باشقا، فولکلور و عاشیق لارین شعر و ماهنی لاری ایله ده تانیس اولوب اؤندان الهام آلېردېلار.»

واقف، اوستادجاسېنا، آذربايجان خلقى نين ادبى - مدنى ارثىندىن يارارلانېدېر. بو يارارلانمادا اۇ مضمون باخېمېندان، شرق كلاسېك ادبياتى نېن فكىرى ارثى نين ان ياخشى كىفېتلىرىنى قورويوردۇكى اۇزۇندىن قاباق و سۇنراكى شاعرلرېن چۇخونون اثرلرېندە گۆزە چارېېر، بو فرق ايلن كى، اۇنلاردا درېن دېگىشېكلىكلر عملە گتيرمكلە، شعرلرېنى كامل لشدردى.

واقف، هر شئيدىن چۇخ، حياتا باغلي دېر. شعرلرى ياشايش گۆزەللىكلرى نين ترنمودور، كلاسېك آذربايجان شعرېندە ال چاتماز عشقى، دنيوى و حسّ اۇلۇنان ال وئريشلى عشقە چئويرەرك، شعر فورمالارېندا خلقىن روحو و دۇشۇنجه سىندىن الهام و قوت آلېر.

واقف رئاليزمى نين چېچك لىمە سىندىن قاباق، يعنى ادبى فترت دۇرۇندە، آذربايجاندا شاعر اۇ كىمسەدن عبارت ايدى كى ايرانىن كلاسېك ادبياتى نېن شعر بۇلمە سىنە عايد قايدا - قانون لارېنې ازېرلەسېن، عروض لا باغلي علملرى بېلسېن و بحرلرى، ازاحيفى و اۇنون مختلف امالەلرېنى اۇز شعرلرېندە باجارباقلا ايشلتسېن. ادب و قلم اهلې نين نظرىنجه شاعر «عروض شناس» اۇلمالېدېر و اۇنلارلا عاشىق، ماهر ماهنې چې و نغمە كار «دراوېش رعات» آدلانېردېلار و كلاسېك شعرىن قانون لارې ايلن تانېش اۇلميان آدامېن آدې هئچ بېر ادبى جۇنگ و تذكرەدە چكىلميردى و يالنىز سىنە دفتر اۇلاراق يادلاردا قالېردې.

واقفېن ان بۇيۇك ادبى خدمتى بو دراوېش الرعاتىن اثرلرېنى (شعرلرېنى) يازېلې و رسمى ادبياتدا انعكاس اتتدېرەك، مىلى شعر فورمالارې نېن

امكان لارېنى گىنىش لىدىرىپ زىگىن لىشدىرىمك و عروض وزىنى نىن محدود
تكنىكاسىنى مىلى شعر فورمالارى ايله قارشىلاشدىرماقدان عبارت دىر.
واقف قىصيده، غزل، مخمس، مستزاد، معشر و رباعياتىندان بللى دىر كى او
عروض وزىنى نىن قايدا- قانون لارى ايله درىندن و هر طرفلى تانبىش ايمىش و
حتى عروض بحرلىرىندە فترت دۇرۇنۇن شاعرلىرىندن داها باجارىقلى شىكلده
شعرلر قوشوردۇ. اۇنون شعرلرى، تقليد و گەۋەزەلىكەن، تكرر و كەنەلىگەن
اوزاق دېر، چۇنكى يىنىلىك چى دىر، كلاسىك شعرىن مضمونونون
دىگىشدىرىجىسى، مىلى موضوع لارېن و يىرلى شعر قىلىپلرى نىن ايشلنمەسى نىن
ماهر اوستاسى دىر.

واقف يىنىلىك چىلىگى نىن اساس خصوصىتى، سۇز (شعر) صنعتى نىن
«تىكىنىتى لوازما تېنى» دىگىشدىرىمەكن و اۇنلارى تىزەلەمەكن عبارت ايدى، و بو
يۇلدا چۇخلو ادبى امك صرف ائدەرك، ادبى دىلدە اۇزۇنە محكم موقعيت
قازانمېش، خارجى اصطلاحلار (ترمىن لر) و تركيبلرى (سۇز بىرلشمەلرىنى)
سىلىب اتمېش و اۇنلارى تىزە و طراوتلى مىلى تعبىرلر (ادبى عبارتلر) و سۇزلرلە
عوض ائتمىشىدۇر.

كلاسىك شعرىن سۇز و تركيبلرىنى اذرى لىشدىرىمىش و خلقىن دىلىندە
ايشلەنن خالص مىلى كەلمەلرى شعرە گىتيرىپ نظمە چكىمىشىدۇر.
باشقا سۇزلە، دىلىن صاف لاشماسى، ياد عنصرلردن تىزىلنمەسى، ياشاماسى
و گەجك نسل لره چاتدېر بىلماسېنا چالېشمېش دېر، سۇزدن استفادە باجارىقلى نې
نمايش ائندىرىمىش و سۇز سىچىمىنە خصوصى دقت يىتيرمىش دىر.

مثال اۆچۆن قید ائتمک لازمدېرکی اؤ شعرلرینده «جان قوشو»، «آی اۆزلۆ»، «خمار گۆز»، «گۆل اۆزلۆ» و «شیرین دۇداقلې» اصطلاح، تشبیه و استعاره لرینی، کلاسیک شعرده اۆلان «مرغ دل»، «ماه رخسار»، «چشم خمار»، «گل رخسار»، «شکر لب» و سائرہ ایله عوض ائدی و جسارتله، خلق کۆتله لرین دلیینده و دانېشېغېندا ایشله ن بېر چۆخ اینجه ترکیب لری ادبی یازېلې دیله گتیردی: «بولود تئلی»، «آی قاباقلې»، «گردنی مینا»، «آغزی پیالا»، «آغ بوخاقلې»، «قېرمېز یاناقلې»، «لاله دۇداقلې»، «بیللور بدنلی»، «گۆنش اۆزلۆ»، «یای قاشلار»، «بال دۇداقلار»، «ساچلارې قارا»، «اۆزۆ آغ»، «گۆز یاشې»، «ائلر یاراشېغې»، «اۆلکه گۆزهلې» و اۆنلارلا باشقا تعییرلر.

واقف شناس لار و آذربایجان ادبیاتی نېن تدقیقاتچې لارې نېن فکرىنجه، واقف رئالیست دیر، رئالیزمین آذربایجان شعرینده بیرینجی ایلکین گۆجلۆ نماینده سى دیر، رمانتیزم اۆنون شعرلرینده ضعیف دیر و حادثه لره رئالیست جه سینه یاناشېر.

بو باخېمدان، ایکی یۆز ایل قاباق، واقفین شعرلری، هم آذربایجان ادبیاتېندا و همده مسلمان ملت لار آراسېندا «یئنی حادثه» ایدی.

بو حادثه اۆنونلا ایضاح اۆلونور کی، آذربایجان ادبیاتېنې بو دۆرده شرقین قونشو و مسلمان ادبیاتېندان تجرید ائتمک اۆلماز. واقف شناس لاردان بیرى دئیرکی: «بو خلق لرین مدنیت و ادبیاتېندا اۆزۆنه مخصوص خصوصیت لر، ملی، جغرافیایی و دیل باخېمدان فرق لر اۆلسادا، اۆنلار، معین و معلوم تاریخی،

واقف، گۆزه‌للیک و حقیقت شاعری ❖ ۶۷

فلسفی، ادبی و گۆزه‌للیک علمی نظردن بیر- بیرلرینه باغلی دېرلار و آیدېن
درک ائدیلن مشترک ادبی سنتلره، صورتلره و اوخشارلیقلارا مالک دیرلر.»

۷- واقفین اجتماعى رئاليزمى و ظالملىرى تنقىد ائتمەسى

واقف اجتماعى حياتىن ضدیتىندىن و ملت مقدراتىنا حاکملىرىن سلطەلىرىندىن و اۆز باشىنالبىقلاردان كىرلىنىر، فکەرە گىدىر، موجود اجتماعى-اقتصادى سىستىمى تنقىد ائدىر، اونا پىس گۇرۇملۇلۇكلە ياناشىر، حقیقتى آراشدېرىر، عدالت سىزلىك، يالان و فېرېلداقچېلىق دان باشقا بىر شئى گۇرمۇر:

من جهان مُکونده، مطلق، دۇغرو حالت گۇرمەدىم،

هر نه گۇردۇم، اگىرى گۇردۇم، اۆزگە بابت گۇرمەدىم.

آشنالار اختلاطىندا صداقت گۇرمەدىم.

بيعت و اقرار و ايمان و ديانت گۇرمەدىم،

بى وفادان لاجرم، تحصيل حاجت گۇرمەدىم.

واقفین ناراضى و بارېشماز روحو، بو «گۇرمەدىم» آدلې معروف شعرينده اۆز انعكاسىنى تاپمېش دېر، بودا هر شئىدن اول اۇنون مستبد جمعيتدن و اجتماعى چكىشمەلردن نفرتىنى افاده ائدىر.

واقف بو شعرده، دىلنچى و شاهى، مقتدى و مقتدانى، عالمى و جاهلى، مريدى و مرشدى، شاگردى و پيرى، شىخى و عابدى، و اورتا عصرلر جمعيتلىرى نىن بۆتۆن لاشخورلارېنى تنقىد اودونا توتور. اۇنلارېن ماهيتىنى آچىپ گۇستىرىر. بو كىمسەلر، دشمن چىلىك و ايكى تيره ليگىن مبلغلىرى دىرلر،

واقف، گۆزەللىك و حقيقت شاعرى ❖ ۶۹

اۇنلارېن ھامې سېنېن مقصدى درھم و دینار دیر، ھامېسى «نفس اماره» نین
اسیری دیرلر و اۆز شخصی منفعتلری اۆچۆن کلک بازلیق و ریاکارلیقلا حقى
باطل ائدیrlر. اگر شیخ دیرلار، حیلە گردیرلر. اگر بیگی دیرلر عدالت سیز و
ظالم دیرلر. و اگر سلطان دیرلار هر دقیقه اۆزگە مملکتلرین اراضی سینە تجاوز
نیتینده دیرلر:

خواه سلطان، خواه درویش و گدا، بالائتفاق،
اۆزلرین قېلمېش گرفتار غم و درد و فراق،
جیفه ی دنیا یادېر هر احتیاج و اشتیاق،
مونجا کیم، ائتدیم تماشا، سۆزلرە آسدېم قولاق،
کذب و بهتان دان سوايې بیر حکایت گۆرمه دیم.

هر صدا و سس کی، دنیا یا دۆلوب اکثر، اقل،
جمله مکر و آل و فن و فتنه دیر، جنگ و جدل،
درهم و دینار اۆچۆندۆر هر شئیە یاپېشسا ال،
مقتدی لرده اطاعت، مقتدالاردا عمل،
بنده لرده سیم و بگیلرده عدالت گۆرمه دیم.

عالم و جاهل، مرید و مرشد و شاگرد و پیر،
نفس اماره الینده سربه سر اولموش اسیر،
حقى باطل ائیلە میشلر، ایشله نیر جرم کبیر،

شىخلىر شىياد، عابدلىر عبوسا قىمىرلىرى،
ھېچ كىسە ھەقە لايىق بىر عبادەت گۇرمەدەيم.

پىس لىك ائىتمەك، رىياكارلىق، ايكى اۆزۈلۈك، يۇلداشلىغا خىيانت، بى عارلىق،
ناموس سوزلوق، قدر بىلمەملىك، غىرىت سىزلىك، وفاسىزلىق كە بو شەردە
اۋنلار نەرت ياغدېرىلەر، فئودال جەمئىيەتلىرىن ايكى يۈز ايل قاباقكى
مىسلمانلار بىن اراضى سىندە ھاكىم طىبقەلىرىن اساس خىسسىيەتلىرىندە دىر.
واقف ھاكىملىرى و اۆزلىرىنى روھانىلەر اوخشادانلارې افشا ائدىر:

خلىق عالم بىر عىجب دىستور توتىموش ھەر زمان،
ھانسى غەملى كۈنلۈ كىم سىن ائدەر اولسان شادمان،
اۋ سە، البتە كى بدگولوق ائىلەر، بى گمان،
ھەر كىسە ھەر كىس كى ، ائىسە ياخشىلىق اولور يامان،
بولما دېم بىر دۈست كى، اۋندان بىر عداۋەت گۇرمەدەيم.

من اۋزۇم چۈخ كۈزەكارى كىمياگر ائىلەدەيم،
سكەلندىردەيم غبار تىرەنى زىر ائىلەدەيم،
قارا داشې دۈندەرىب ياقوت اھمىر ائىلەدەيم،
دانەى خرمەرىنى دۈرە بىر ائىلەدەيم،
قدر و قىمەت اىستەيىب، غىر از خىسارت گۇرمەدەيم!

گۆن كىمى بىر شىخىسە گۆندە خىر وئرسىن سىدەزار،
ذرهجه ائتمىز ادائى شىكر نعمت آشكار!
قالمايىبدېر غىرت و شرم و حياء ناموس و عار،
دئىلر كى اعتبار و اعتقاد عالمده وار،
اوندان اۆترو من ده چوخ گزديم، نهايت، گۆرمەدیم.

قدر بىلمەين جمعيتدن عذاب چكن واقف، تأسفله نىركى خىر و شر
قاربشېب، ايگيدلر ذليل اولوب، اخماق لار عزيز، وارلې لار خسيىس، سخاوتلې لار
بى نصيب اولوب لار، اداملارېن وقتىنى ترك دىيالىق و جمعيتدن تجريدە
(گوشه نشين ليگه) يۆنلەدر ك بئله دئىير:
مختصر كىم بئيله دنيادان گرەك ائتمك حذر،
اوندان اۆترو كىم دەگيلدير اۆز يئرینده خىر و شر،
عالېلار خاك مذلته، دنى لر معتبر،
صاحب زرده كرم يۇخدور، كرم اهلينده زر،
ايشلنەن ايشلرده احكام و لياقت گۆرمەدیم.

بو مخمس طرزینده كى شعر، آراز داداش زاده نین فكرینجه شرقین اورتا
عصرلر شعر خزینه سى نین قىمتلى اینجى لریندن و دنیا ادبى اثرلری نین گۆزەل
و ابدى، اجتماعى مضمونلو شعر نمونه لریندن واقفین اجتماعى رئالیزمى نین

پارلاق تجسمودور. اۇنون معاصرلریندن ھئچ بیرى زمانهسى نین عیبه جریلیگینی واقف کیمی آچیب گۆستریب و افشا ائتمه ییب دیر.

واقف تنقیدلرینده، انسانا، امن-امان لبق، باربشبق و یاشاماق دان لذت آلماق آرزی لایبر و بو مقصد اۆچۆن هر جور مانعه یه چتین لیگه و فداکارلیغا دۆزه رک اۆز-اۆزۆنۆ اوندورور:

مکان مردم نیکو مخوف و ظلمانی است،
چه گنجها به خرابات دهر پنهانی است.

اؤ، دوستاغی ایگیدلره میدان حساب ائدیر. بو شعرلردن معلوم دورکی، واقف آذربایجان تاریخی نین قارانبلق مرحله لریندن بیرینده اۆز ملی-اجتماعی مسئولیتینی درک ائدیپ، نسیمی سایاغی اۆز دۆرۆنۆن قانلی دۆیۆش لرینده اشتراک ائدیپ، حتی طنطنه لی یاشاییش و سارای مناسبت لری ده اۇنون بو درین بشری ادراکنا مانع اؤلا بیلمه ییب و بلکه سارای خدمت لری واقفین مثبت شعرلری نین ماهیتینی قیمتینی اۆز دۆرۆنده یۆز قات آرتیرمیشدیر.

ایکی یۆز ایل اۆنجه - یعنی خان لار و امپراطورلارین ظلم، قهرغین و غارتلری زمانى- واقفانه رئالیست جه سینه دنیا گۆرۆشۆ اۆلان شاعر تانیمبریق، خصوصیه لیریک شاعرلردن رئالیست تمایل گۆز لیلیمزدیر، چۆنکۆ «لیریک ادبی مکتبین» شعر امکان لاری محدود و واقفین صنعت متودیکاسی اۆزۆنۆن معاصر و حقیقی معناسیندا رئالیزمدن کنار دیر. واقف تغزلون- عاشقانه

واقف، گۆزەللىك و حقيقت شاعرى ❖ ۷۳

شعرلرين - مغنىسى دىر، بونونلا بئله اۇنون «اۋزۇنە مخصوص رتاليزمى» تدقيق
و تقديره لايىق دىر.

۸- واقفین مترقى دۆشۈنچەسى و خوش گۇرۇملۇلۇگۇ

واقفین تارىخى رئالیزمى نین قارباق خصوصیتلری مثبت تفکر و خوش گۇرۇملۇلۇکدن عبارت دیر کی اۇنون ادبی یارادېچې لېغې نېن بو جەتتى بۇتۇن شعرلرینه- قۇشمالار، غزللر، گۇزللملر و مخمس لرینه حاکم دیر. اۇنون معاصرى «ودادى» فیلسوفجاسینا پیس گۇرۇشلرله (بدین لیکله) آذربایجانېن لیریك شعر دفترینی، غم، غصه و کدرله دومانلاشدېرمېشسا، واقف مثبت گۇرۇش ایله، تاریخ صحیفه لرینی قېزېل خطلرله بویامېشدېر.

واقف شعرى اۆز خوش گۇرۇملۇلۇگۇ ایلن دیر کی کلاسیک شعردن اوزاق لاشېر، یئنی مرحله یارادېر و بو خصوصیت، اۇنون رئالیزمى نین ان اهمیت لى جەت لریندن دیر. بئله لیکله دئمک اۇلار کی واقفین بۇتۇن شعرلری و ادبی یارادېچې لېغې نېن بینۆورهسى شادلیق، شلیک، عشق و محبت اوزه رینده قورولموشدور . . . و بو نوع یارادېچې لېق اۇ دورون اساس خصوصیتینه شعرین «غم فلسفه سینه» بۇرۇنمه سی و «پوچلوق» یا نیهیلیزم قېنېنا گیرمه سینه نسبت غریبه و تزه بیر حادثه ایدی. اۇنون آلولو لیریزمى انسانېن شادلیق لادولو حیات طرزینی باجارباقلا تصویر ائدیر، ریاسیز عشقى و خالص سئوگینی ترنم ائدیر. لیریزمى ائله آچېق آیدېن دېر کی بعضی کیمسه لر اۇنو «شېوانى» شاعر آدلاندېرېلار، اما اۇنلار یانېلېبلار، چۆنکۆ صاف عشق و پاک محبتدن غافل دیرلر.

۹- حقیقی مضمونلو و رئال موضوعلو ادبی - بدیعی

یارادېچېلېق

یوخارېدا قید ائتدیک کی واقفین اؤدلو و هیجانلی تغزلو، فولکلور، شفاهی ادبیات و آذربایجان خلقی نین یاراتدېغې اثرلرله دریندن باغلی دېر. بو اؤنون رئالیستیک ادبی فعالیت نین، اصیل و گۆزه چارپان خصوصیت و جهت لریندن بیریدیر. اؤنون شعر دیلی رئالیزم دیلی نین کامل نمونه سی و خارجی عنصرلردن آرپانان بیر دیل دیر، استفاده ائتدیگی وزن لر و قلیبلر ایسه، رسمی ادبیاتین سنتی ترکیبلر و تعییرلری و عاشیق ماهنې لاری نېن هجا وزن لری ایله بیرلشمه سیندن عبارت دیر.

عاشیق لارېن یارادېچېلېغې ایله واقف شعر نین اوخشارلېغې و یاخېن لېغې اؤزۆنۆ داها چۆخ فورما، قالب، آشېلادېغې مضمون لار و بدیعی وسائیلده، شعر نین قورولوش و وزنینده، قارباق شکلده گۆستریر. واقف دۆرۆنۆن رسمی ادبیاتېندا، عاشیق لارېن یارادېچېلېغېنا یۆنلیمک تأکید، بیر نوع، سنت لری آتماق و یئنی لیک چیلیکدن عبارت ایدی. واقف عاشیق شعریندن الهام آلب، خلقین دیلی و عادت لری نین کلاسیک مترقی سنت لرله بیرلشدیریب، غزل لر و مخمس لر و سائرده ائله گۆزل بدیعی شکل لر یاراتدې کی، بو یارادېچېلېق عروض وزنلی شعر ساحه سینده ده اؤزۆنه مخصوص مرحله تشکیل ائدیردی.

آیدېن دیر کی فارسجا و تۆرکجه غزلین قایددا- قانونلارېندا غزل بیتلری نین مضمون باخېمېندان علاقه سی و آردېجېل لېغې اساس مقصد دگیل دیر. البته بیز حافظ و فضولی غزل لرینده و یا خود ختایی و نسیمی نین عقیده تی شعرلرینده و بعضی شاعرلردن باشقا، بو مقصدی مراعات ائدنلره راست گلمیریک. اما واقف غزل لری نین ان قابرېق جهتی، «مضمونجا علاقه لی اولان بیتلر» دیر کی بیر باشا اونون قوشمالارېندان، هجا وزنلی شعرلریندن و حقیقی ادبی- بدیعی یارادېجېلېمېندان غیدالانیر.

باشقا جهت، مضمونون طبیعی لیک و گئرچک لیگیندن عبارت دیر کی بو خصوصیت واقفدن قابقی شاعرلرین اثرلرینده حسّ ائدیلیمیر، عمومی جهت تشکیل ائتمیر و یا خوددا تصادفی حالت کیمی بروز ائدیر.

مثال اوچون اونون نچه غزلی نین مطلع لرینی آشاغیدا قید ائدیریک:

حبیبیم بو نزاکنده گؤل رعنادان آرتېقسان . . .
ای گؤل خندان فراغېندان سنین قان آغلارام . . .
آیدېن اولسون گوزلریم کیم گلدی یارېن کاغذی.

ولاکین غزل لر تکنیک، اُسلوب و سؤز بزه ک لری باخېمېندان قوشمالار و هجا وزنلی شعرلردن آشاغی سویه ده دیرلر. واقف غزل لرینده بعضاً کلاسیک

شعرین پوچ و کهنه سنت لرینده محافظه ائدیر:

ریا و کبر و کذب و بخل اولور نایاب ایگیدلرده،

تواضع دور، صفا و صدق ایله اسباب ایگیدلرده.

اۋزۇن كىشى دئەن كىمسە، صداقت صنعتىن ايشلر،
نەدن كى اولمايىدېر ھىچ كس كذاب ايگيدلردە!
ھجوم لشكر تكليف ياران وفادارە،
مثال سد اسكندر گرە كدير تاب ايگيدلردە.

اما بو نقصان اونون بۇتۇن شعر و يارادېجىلېغىنا شامل ائدىلمىر. واقف ايستر
غزل لر يندە و ايسترسەدە مخمس لر و باشقا عروض وزنلى شعر لر يندە، حيات و
معيشت مسئلە لر ينى ايرەلى سۇرمۇشدۇر كى اۋز دۇرۇنە نسبت بو مسئلە لرە يا
تۇخونولمايىپ يا خود اۋنلار ازاچىق ياناشىلېپ. ھابئەلە بو شعرلردە گرجستان
حاكىمى و خان قېزى ستايش، محمد حسن خان مشتاق ايسە تعريف
اۋلونوبدور. بونلار واقفين خارجى اشغال چىلار قارشى مبارزلىك روحوندان،
آذربايجان و قفقاز خانلىق لار ي نېن روس دولتى عليھينە بيرلشمەسى نين
طرفدارى اۋلدوغوندان خبر وئير.

۱۰ - ياشايشا باغلى لېق

آذربايجان ادبيات تاريخينه ايكي ادبي شخصيت درين تآثير گؤسترميشلر بيرنجيسى «فضولى»، كى سون دؤرد يۆز ايل عرضينده غزل شاعرلىرى اؤنون تغزل مكتيبين تآثيرى آلتيندا اولوبلار، و ايكنيجيسى ملاپناه واقفدير كى ايكي يۆز ايلديركى قوشما و هجا وزنلى شعر قوشان شاعرلر، بلاواسطه اؤنون ادبى مكتيبينه تابعديرلر. و اؤزلىرى نين اثرلىرىنى زنگين لشديريپ دؤلغون لاشدېرماق اؤچون، اؤنون ادبى ارثيندن غيدالانېرلار.

واقفين هيجانلي، رئال و سئوگى مايالي تغزلونده، انسان اؤچون بارېشېق، راحتلىق، امن - آمان لېق طلب اولونور. او انسان لارې قارداش، يۇلداش، كين - كدورت و دشمن چيلىكدن اوزاق گؤرمك ايسته يير.

اوخوجولارېنا شعرلىرى نين واسطه سيله ديگرلى اوؤد وئرمكله ياناشي، ظالم لر و قان ايچن لرى ده بارېشېغا و انسانلېغا دعوت ائدير. انسانېن سعادت و گؤزل ليگيىنى ياخشې لېق لارې سئومكده گؤرؤر، جراتلى آروادلارې تانرېچالاردان، قدرتلى لردن و حاكم لردن اؤستون توتور، ياشايشېن مثبت - منفى جهتلىرىنى قلمه آلېر، جمعيتين پيس ليكلرينه نفرت ياغدېرېر، آخېجي سؤزلر، روان و سليس تعبيرلرله بولور كيمى زينه بولاق يارادېر، ائله كى بير نئچه بيت شعرى ايلن اوخوجونون اؤزؤنه معنا دولو بير عالم آچېر، انسان اؤره گيىنى يوموشالدير و كيچيك شعرلرده بئله عاشقانه سؤز اينجى لريله گؤزل

واقف، گۆزەللىك و حقيقت شاعرى ❖ ۷۹

ناخېشلى، اينجه تۇخولو، محكم تىكىتتىلى، گىنىش توتوملو و درين اۇزۇللۇ
صنعت يادگارى يارادېر.

حياتا باغلىلىق، سىت و عادتلر وورغونلوق، انسانېن گوزل ليگينه، آرزى،
آمال و ميل لرينه محبت بىلهمك، سئوگى ايله ياناشماق، حياتى تظاهرلر
اۆره كدن باغلاشماق و عشق فلسفه سىنى درين تحليل ائتمك واقفين ادبى
ارثىنى ابدى لىشديرن عامل لردن دىر.

۱۱ - ادبی تأثیری

واقف مکتبی نین شاعرلرین ادبی فعالیتینه تأثیری و آذربایجان ادبیاتینین تکاملونده کی رولو، هله شاعرین ساغلیغیندا حسّ ائدیلمهس. واقفدن تأثیرلنن بعضی شاعرلرین آدین چکیریک:

۱ - ۱۱. ملاولی ودادی

ودادی یارادبجیلغینین هر طرفلی، شدتلی و دریندن تأثیرلنن ادبی شخصیتلردن بیرینجی و باشلیجاسی واقفدیر. غملی شعرین ان بویوک مرشدلریندن اولان ملا ولی ودادی یوز ایلدن آرتیق یاشادی، بیر مدت جوشیر ایالتینین گلستان خانلیغینین خدمتینده اولوب و گرجستان حاکمی هراکلیوسون ساراییندا یاشایب و واقفین اولدورولمه سیندن ۱۲ ایل سونرا وفات ائدیلمهس. اوز زمانه سینده رسمی و ادبیانه شعرده شهرت لیمیش دیر. تورکجه، عربجه و فارسجا دیللری دریندن اوغیرنیمیش.

غزل لری، مخمس لری و مسدس لریندن قدرتلی شاعر و شعر قایدان- قانونلارینا دریندن بلد اولدوغو معلوم دور. شعرلری نین مضمونو، آه و ناله، حزن و حسرت، غم- غصه دن عبارت دیر، بو شعرلر شاعرین پیس گوروملولوکله مایالانمیش حساس، ساکت و خیالاتی روحوندان تورهنیدیر.

غزل لرينده «فانى دنيانى»، «بلا ميدانېنا» اوخشاداراق كى او ميدان دا اۆز
باشېنى «بلا چوگانې نېن اويونجاغې» ائتدیرمیشدیر، اۆز اؤخوجولارېنى،
«آلچاق لېق لار» دنياسېنى ترك ائتمگه چاغېرېر و بۆتۆن فلاكت لرين سببىنى
«تقدیر و قصاده» اختارېردې.

واقف، ودادى ايله مباحثه و مناظره لرينده، اونون دۆشۆنجه لرينى تنقيد و
اۆزۆنه مخصوص گۆلگۆلۆ طرزده خان لار و حاكم لردن اوزاق اولماغې اونا
توصيه ائتمیشدیر:

ای ودادی! سنين بو پوچ دنيادا،
نه دردین وار کی زار- زار آغلارسان؟
آغلالمای گۆنۆن آخرتدهدیر،
هله ایندی سنده نه وار، آغلارسان؟

تا جسدین جدا اولمايېب جاندان،
بیل اۆزۆنۆ آرتېق سلطاندان، خاندان،
غریبلیک، آیرېلېق نه دیر کی اوندان،
بو قدەر چکيېن آزار، آغلارسان؟

سای غنیمت دیریلیگین دمینى،
گئچهن همدملرین چکمه غمینى،
عاغلېن اۆلسون، سیل گۆزۆنۆن نمینى،

دخی گئری گلمز اۇنلار، آغلارسان؟

مباحثه و مناظره‌لرده واقفین منطق‌لی یاناشماسی و قدرتلی شخصیتی، تأثیر ائدیجی کلامی نتیجه‌سینده، ودادی‌نین تفکرۆ دریندن دگیشیب، شعرلری ایستر شکل و ایستره‌ده مضمون باخیمېندان، تامیله دگیشیک‌لیگه اوغرایېب، بئله کی غملى- کدرلی عروض وزنلی شعرلر حرکت و فعالیت مضمونلو قوشما و گرایلی لارلا عوض ائدیلدی. بو نوع شعرلرده ودادی، آزادجاسېنا، آنا یوردونو، داخماسېنې و خلقی، دبدبه‌لی سارای حیاتېندان اۆستۆن توتور. حتی سارای لارېن طنطنه‌سی، شهرت و نعمتین جاذبه‌سی‌ده اۇنون اۆره‌گیندن خلقین خلقه محبتی و وطنه باغلېلېنې سلیب آتا بیلمه‌دی.

واقفین ادبی مکتبی‌نین تأثیری نتیجه‌سینده، ودادی‌نین شعرلری اۇ قدەر اینجه‌لیب، مضمونلو و دولغون اولوب و زنگین‌لشدی کی ضرب المثل‌لر کیمی دیل‌لر ازبری اۆلدو.

واقفین ودادی‌یه تأثیری اۇ قدەر درین و گۆجلۆ ایدی کی ودادی اۇنون شعرلری‌نین چۇخونا استقبال و نظیره یازدې و اۇنلارېن بعضیسی آذربایجان ادبیات تاریخینده ائله محکم سنته چئویریلدی کی ایل‌لر بویو ودادی‌نین بو شعرلرینه نظیره یازماق ادبیات تاریخینده دوام ائتدی.

سیاسی حادثه‌لرین هم اجتماعی، همده مدنی- ادبی تأثیرى انکار ائدیلمزدیر. واقفین آجېناجاغلی صورتده اۆلدۆرۆلمه‌سی ودادی‌نین ده ادبی-

بديعى يارادېجىلېغىنا درىندىن تائىر ائتدى و ودادى دە جمعيته نسبت درين نفرت و غضب وجودا گتيردى.

۲- ۱۱. قاسم بگى ذاكر

واقفين ودادى دن سؤنرا بلاواسطه تائيرىنى قاسم بگى ذاكرين- ادبى يارادېجىلېغىندا هجويات ادبياتى نين بانيسينده - گۆرۆرۆك. ذاكر زمانهسى نين قاداغالارېنا باخمايلاق جرأت و جسارتله، دۇرۇنۇن نقصان لارېنى آشكارلامېش، اۇرۇنۇن گۆجلۇ سلاحي (هجوياتى)، قابليتى، يارادېجىلېغى، دھاسى و تنقىدى قلمى ايله اسگىكلىكلرى لاغا قويموش و عيبهجرلىكلرى آچىب گۆسترميشدير.

ذاكرين ايتى قلمى ايله نشترلهديگى اساس موضوع لار آشاغىداكېلاردان عبارتدير: نوروز بايرامى، رمضان ايامى، محرملىك مراسمى، تاجرلرين قالماقالي، باققال لار، دارغالار، اعيان لار و روحانى نملارېن اخلاقياتى.

ذاكر، شعرلرى نين طنزى و هجوى مضمون لارېنى افاده ائتمك اۇچۇن ساده ادبى قليب لردن قۇشما و هجا وزنلى باشقا شعر فورمالارېندان استفادة ائديردى. او بو ادبى قالب لرى سئچمكده، واقفين ادبى ارثينه شاگردجه سينه دقت يئتيرهرك اۇندان الهام و يارادېجىلېق قوتى آلېردى و حتى اۇز دۆشۆنجه لرىنى آنلاشېلې و داها آيدېن آشېلاماق اۇچۇن بئله، واقف شعرلرىنى - خلقين دىلى نين ازېرى اۇلان- اثرلرى استقبال ائديردى. مثال اۇلاراق واقفين معروف «دورنالار» شعريندن همين شعر كى ودادى اۇنا نظيره يازماق

ایلن نظیره چیکیلده بیر سنته چئویریلیمیش دیر، استفاده اندره رک روس دولتی نین محلی حاکم لرینه اعتراضینی بیلدیرمیشدیر:

قطار - قطار اؤلوب قالخیب هوایا،
نه چېخېب سېز آسمانا، دورنالار؟
غریب - غریب، غمگین - غمگین اؤته رسیز،
اؤز توتوبسؤز نه مکانا، دورنالار؟

۳- ۱۱. سید ابوالقاسم نباتی

هامېدان چۇخ واقفدن تأثیرلنن ادبی شخصیتلردن بیرى ده، شاعر سید ابوالقاسم نباتی دیر. جوشغون طبیعتلی، وجودو هیجان، روح یۆکسک لیگی، ملی احتراض لار و آزاد یاشاماق عشقی ایله جوشوب داشان نباتی، ایران و روس دولت لری نین قانلی ساواشلاری دورۇنده یاشاییر و فتحعلی شاه ایله روس پادشاهی نین چکیشمه لری نین ناظری، دهشتلی قېرغېن لارېن و آغېر حربی وئرگی لرین شاهدی اؤلموش دور.

«خان چوبان» تخلص لو نباتی کی تذکره یازان لار، شعرلرینده کی فلسفی مضمون لار و عارفانه سرلره گؤره، اؤنو «درویش مسلک و صوفی مشرب» آدلاندېرمېشلار، حروفیه مرامیندان شاخه لنمیش مبارز باطنی فرقه لره باغلی ایدی و اؤنلارېن آمالېنې تبلیغ ائدیردی.

نباتی یاشایېشې نېن آز سایېلې تدقیقاتچې لارې، اؤنون حروفی مسلک اؤلماغېنې نظره آلمایاراق، نباتینی گاه صوفی، گاهدا حلولی قلمه وئریب، بعضاً ده اؤنون باره سینده بئله یازېب لار: «حیرت، دهشت و تعجب حالتینده یاشایاراق،

شرق دە ھىچ بىر مەھبى فرقلەرە ایمان گتیرمەيیب و اۆزۈنۈن سرگردان حالتلرینی افادە ائتمیشدیر.» و اۈنو صوفیە مەھب، طریقتلر اراسیندا آسلانپخلى وضعیتدە تصویر ائتمیشلر.

بو فکرلری سۈیلەینلرین ھامبسی البتە کی یانبلبلار، نباتی دە اۈز سلفی نسیمی کیمی، بۆتۈن ۈمرۈ بۈیۈ، فداکار جاسپنا «حروفی لیک» ایدەآل لارینی، فضل الله نعیمی تبریزی نین عقیدەلرینی و حروفیە نین باشقا بۈیۈک نمایندەلرینی قیزغین مدافعه و بو فلسفی - مەھبى مکتبین مترقى فلسفە سینی و دنیا گۈرۈشۈنۈ تبلیغ ائدیردی. بونا گۈرەدە اۈز دۈرۈنۈن نعمت اللهی طریقتی نین مرشد کامل مقامینا قدر یۈکسلدی. اۈنون سادە، آخچې، سلیس و آنلاشېقلى دیلدە و ھجا قالبلریندە سۈیلەدیگی تام معنالی عالمانە، «مقدس کلام لاری» و شعریت دۈلو سۈزلرینی ھلەدە «اھل حق» فرقلەلرینە اینانان لار اۈز سنتی محفل لریندە، مەھبى مراسمە مخصوص ھیجان و جذبە (شور و حال) ایلن ترنم ائدیرلر.

نباتی بو شعرلریندە انسانی کائناتین محوری حساب ائدەرک، اۈزۈنۈ «سر ھویدا» بیلەرک ادعا ائدیرکی بۆتۈن پیغمبرلرین معجزەلری (معاذ الله) اۈندا تظاهر ائدیپ و خرافات ایلە موھوماتا ضربەلر یئندیرەرک انسانی بو دنیادا سعادت و شادیانالبغا چاغېرېر.

ودادی نین شعرلری نین یاربدان چۈخو آذربایجانین گۈزل طبیعی منظرەلری نین وصفی و گۈزل - گۈیچک قادېن لارېن تعریفی و سادە ائلات حیاتی نین افادە سینە حصر ائدیلمیش دیر. معاصرلری ایلە مقایسەدە، اۈنلارېن

هئچ بیرى نباتى قدير طبيعتين ياشېلېق لارېنا و اونون قوينوندا ياشاماغا وورغون اولمامېشلار.

بۆتۆن آخېچې و اۆره گيه ياتېچې قوشمالارې، گرايلى لار و تجنيس لرى نين مضمونونو فورمالاشدېران دا طبيعت له باغلي موضوع لاردير. بو ساحه ده واقفين ادبى يارادېچېلېغې نېن بلاواسطه تأثيرى قابارېق و آيدېن شكلده حس ائديليير. نباتى ده واقف كيمي، آذربايجان تۆركجه دىلى نين تۆكنمز امكان لارېندان استفاده ائدرهرك، خلقين دانېشېق دىليندن تشبيه و تعبيرلىرى سئچهرهك ادبى- بديعى سنت و قانونا اويغونلوقلارې مراعات ائدرهرك، جرأت و جسارتله، رسمى و يازېلى ديلده ايشلهدير.

مثال اولاراق نئچه اصطلاحا اشاره ائديريك: هويلاما، آغجا باغجا، هوورليك و سائر.

نباتى نين شعرلىرى نين چوخو «خلق ماهنې لارې» شكلينده قلمه آلېنمېشدير، مثلاً «خان چوبان» ماهنى سى كه سيد ابوالقاسم نباتى دن دير كى روس اشغالى نتيجه سينده آذربايجان ايكى بۆلۆندۆكدن سونرا يايلاق و قشلاق لار آراسېندا سرحد چكىلديگى و آزاد صورتده طبيعت دن استفاده ائتمك قاداغان اولدوغو اۆچۆن، نيسگيل، غم، غصه و آغرى- آجېلارېنې خان چوبان آدلى ماهنې دا انعكاس ائتديرميشدير:

گئدين دئيين خان چوبانا،

گلمه سين بو ايل مغانا،

گلسه باتار ناحق قانا.

آپاردې سئلر سارانې،
بىر گۆزل گۆيچك بالانى.

نباتى، واقف ادبى مکتبى نىن جريانېندان تأثير آلاق، واقفين شعر
مکتبى نىن متشکل ليگينده ادبى امک صرف ائدەرک، اؤنو طبيعتين توصيفى و
ائلاتېن ياشايشي ايله دولغونلاشدېرېب زنگين لشديردى و آذربايجان
ادبياتي نېن رئاليزمه دؤغرو حرکتينى ثابت ليک و تکامله ساري يؤلتىدى . . . و
سؤنراكى شاعرلرين دقتينى اؤزؤنؤن ادبى ارثينه جلب ائتدى.
نباتى شعرلرينده، اؤزؤنؤ واقفله مقايسه ائدەرک، اؤنون قارشېسېندا - كى
قاراباغېن مغنىسى ايدى - اؤزؤنؤ قاراداغېن بۆلبۆلؤ آدلاندىرېر:
من نباتى داغم، بلبل قاراداغم،
داغ من سيه دل کرد لاله هاى حمرا را.

رئاليست نباتى، اؤز دؤرؤنؤن تاريخى - اجتماعى محصولو ايدى، ييز اؤنون
حاققېندا معلوماتى واقفدن تأثير آلدېغې اؤچؤن اؤخوجولارا تقديم ائتيديک، بو
تأثير، نباتى نىن گۆزل لرى توصيفينده داها قابارېق دېر. هابئله اؤنون بىر چؤخ
شعرلرينى تنظير ائتميشدير. مثلاً آشاغېداكى غزل واقفين بىر غزلينه نظيره
اولاراق يازېلمېشدير:

جانا اؤد ووردوم اؤزؤم، پروانه لردن کؤسمؤشم،
تا كى مجنون اولموشام، ديوانه لردن کؤسمؤشم.

بىر غلط سۆز دور كى دئىرلر گىچ اۇلور ويرانهده،
گىچ يۇخ، ويرانه يۇخ، ويرانه لردن كۆسمۆشم.
حاصليم اۇلدو تجرددن ندامت گوشهسى،
ايندى اۇل باش آغرىدان افسانه لردن كۆسمۆشم.
من ائشيتديم: اۇل گۆلۆن ميخانه لردىر منزلى،
اصلى يۇخ گۆردۆم، گليب ميخانه لردن كۆسمۆشم.
خانماهمدان منى سالدې نباتى در به در،
عقله باخ، مجنون كيمى بىگانه لردن كۆسمۆشم.

اۆشتىن لى سيد ابوالقاسم نباتى نىن قيمتلى زنگين ليрик ارثى نىن
خزينه سى واقف ادبى مکتبى نىن دۆلغون مضمونوندان كفايت قدەر
مايالا نىمېشدير، نباتى آذربايجان شعرينى، رئاليزمىن يۆكسك ديروه لرينه
قالدېرراق، اونون تكاملونه شدتلى تائير گۆسترميشدير.

۱۲ - واقف - نباتی ادبی جریانی

نباتی دن سؤنرا، ادبیات تاریخیمیزده واقف - نباتی نین مکتبی حاکم اولور و شعرین اصیل جریانین تشکیل ائدير. حتی غزل یازان شاعرلرده بو مکتبین تأثیریندن کناردا قالا بيلميرلر، بو مکتبین بؤيوک ادبی شخصیتلری آشاغېداکی لاردان عبارتدير: حیران خانم، سید عظیم شیروانی، خورشید بانو ناتوان، محمد باقر خلخالی، شکوهی مراغه‌ای، رضا صراف، لعلی ایروانی، حکیم هیدجی.

اؤنلارېن حتی شعر دیلی واقف و نباتی دن قابقکی شعر دیلیله فرق لیدیر. مثال اؤچۆن میرزا محمد باقر خلخالی نین ثعلبیه یاخود «تۆلکۆنۆن احوالاتی» آدلې کتابېنی قید ائتمک لازمدیرکی فولکلوریک مضمونو و خلقین دیلینه یاخېن اۆلماسې باخېمېندان، «واقف - نباتی ادبی مکتبی» ایله قېرېلماز علاقه ده دیر و واقفدن قابقکی مثنوی لر ایلن، مثلاً مسیحی نین «ورقا و گلشاه» مثنوی سی ایله هر جهتدن فرق لیدیر و اؤزۆنۆن بیتگین مضمون و قورولوشونا گۆره، واقف - نباتی مکتبی نی آذربایجان شعرینی مضمونجا و فورماجا رئالیزمین ان یۆکسک ذیروه سیننه سوق ائتدیردیگینه دانیلماز ثبوت دور . . . بونونلادا آذربایجان شاعرلرینی اوزون مدت بو ایکی (واقف و نباتی) بؤيوک ادبی شخصیتین پرستش کارېنا چئویردی، نئجه کی سید عظیم شیروانی کیمی شاعر

❖ ۹۰ واقف- نباتی ادبی جریانی

و فیلسوف واقفین فداکارلېق لار و مبارزه لرینی تصویر ائتمکله، اؤنون شوشا
قلعه سینده تجاوزکارلار و اشغالچیلار قارشېسېندا مقاومتیندن یاد ائده رک دئییر:
شیشه را باریده است از چرخ، سنگ فتنه‌ها،
بر حصار شیشه لطف حق نگهبان می‌رود.

۱۳ - واقف شناسلىغا عائد بعضى منبع لار

واقفين اۆلدۆرۆلمەسیندن سۇنرا، ئۇى غارت ائدىلەرەك دیوانى نین الیازما نسخەلری اۇغورلاندی، سۇنرالار، ادبیات سۇنلرین الینده اۆلان بیر نئچه نسخه و جۇگلرین اساسیندا دیوانى چاپ اۆلدو. بیرینجى دفعه میرزا یوسف قاراباغى - واقفين قتله یئتیریلمه سیندن ۶۰ ایل سۇنرا «واقف و باشقا معاصرلری» عنوانلی کتابدا بو شهید شاعرین ۷۰ شعرینی چاپ ائتدیردی و بونونلادا واقفين آدی و اثرلری آشاغیداکی تذکره و کتابلارا یۆل تاپدی: «قاراباغ نامه تذکره سی» میرزه آدی گۆزلیک، «تاریخ قاراباغ» و «گلستان ارم» عباسقلی آقا باکیخانلی و میر محسن نواب «تذکره ی نواب».

۱۹-ونجو عصرده، آذربایجانین ایکی بۆیۆک متفکر و فیلسوفو، میرزه شفیع واضح و میرزا فتحعلی آخوندزاده، واقف اثرلری نین چاپ اۆلماسی اۆچۆن چۆخ چالیشدیلار، اما موفق اۆلمادیلار.

معاصر دۆرده واقفين شعرلرینه دقت آرتاراراق، دیوانى بیرینجى دفعه ۱۹۰۷-ینجى ایلده هاشم بیك وزیرف مطبعه سینده باکی دا چاپ ائدیلدی.

فریدون کۆچرلی، آذربایجانین گۆرکملی ادیب و مورخى ۲۰-ینجى عصرین اول لرینده، بیر نئچه مقاله دن علاوه، اۆزۆنۆن ۴ جلدلیک «آذربایجان ادبیات تاریخی نین ماتریال لاری» آدلې کتابیندا واقف حیات و اثرلرینی گئنیش شرحلرله قلمه آلدې و اوندان سۇنراکی معروف یازېچې و ادیب لار: محمد سعید

اردوبادی، یوسف وزیر چمن زمیلی، عبدالله شائق و حسین مهدی واقفین یاشاییش و اثرلرینی علمی شیوه لر ایله تدقیق ائتدیلر.

سلمان ممتاز ۱۹۲۵ و ۱۹۲۷-ینجی ایللرده واقفین دیوانین تصحیح ائده رک چاپ ائتدیری و ۱۹۴۵ ده حمید آراسلی دیوانین تنقیدی متنینی حاضرلایارق، «آذربایجانین مختصر ادبیات تاریخی» و «آذربایجان ادبیاتی تاریخی ۱۸ و ۱۹-ونجو عصرلر» ده واقف حاققیندا علمی تدقیقات چاپ ائتدیره رک، بو معلوماتی سؤنرا اوچ جلدلیک «آذربایجان ادبیات تاریخی» آدلې کتاب دا ۱۹۶۰-ینجی ایل ده دقیق لشدیریب تکمیل لشدیردی.

بو تاریخ دن سؤنرا، آذربایجان دیللی کتاب لار و مجله لرین چؤخوندا، واقفین اثرلری، دُورؤ و حیاتی باره ده علمی-جدی مباحثه لر عمله گلدی و حتی واقف مسئله سی باشقا اؤلکه لرین آذربایجان شناس لاری نین دا دقتینی جلب ائدی، او جمله دن دکتر احمد جعفر اوغلو، آذربایجان ادبیاتی نین تۆرکیه ده تدقیقاتچېسی، واقفین حیاتی باره سینده تدقیق ائده رک، «آذربایجان ادبیاتیندا واقف و ودادی یارادبجیلېغې» عنوانلی کتاب ۱۹۵۲-ینجی ایله آنکارادا چاپ ائتدیردی.

۱۹۶۷-ینجی ایله واقفین آنادان اولماسی نین ۲۵۰-ایل لیگی طنطنه لی مراسم لرله قید ائدیلدی، چوخ سایلی ادیب و شرق شناس لاری ن دقتینی جلب ائدی، واقفین اثرلری، حیاتی، فکرلری و معاصرلری باره ده چؤخلو علمی تدقیقات آپاریلدی و یاشاییشی نین چؤخلی اینجه لیک لری آشکار ایله رک اثرلری چؤخ-چؤخ دیلره چئویریلدی.

واقف، گۆزه‌لیک و حقیقت شاعری ❖ ۹۳

اؤ جمله‌دن سئچیلیمیش اثرلری فارس دیلینه دکتر احمد شفایی طرفیندن ترجمه و چاپ اولوندو عباس زمانوفدان دا فارسجا بیر مقاله «دفترهای زمانه» آدلې فصل‌نامه‌ده رحمت‌لیک سیروس طاهباز واسطه‌سی ایله نشر اولدو. بو کتابین مولفی طرفیندن ده «هنر و اجتماع» آدلې هفته‌نامه‌ده تبریزده یازبیلار چاپ ائتدیریلدی.

واقف حاقق‌بندا ایکی مهم ادبی اثرین ده آدېنی چکمک لازمدیر: یوسف وزیر چمن زمیلی‌نین «ایکی اود آراسېندا» رومانی و صمد وورغونون «واقف» آدلې منظوم نمایش‌نامه‌سینی.

* * *

بو کتابچانین یازبېشېندا یوخاربدا آدلارې چیکلسن کتاب‌لاردان باشقا، آشاغېداکی منبع‌لردن ده استفاده ائتدیک:

- تاریخ سرجان ملکم، ج ۲.
- ناسخ التواریخ، جلد قاجار.
- خواجه‌ی تاجدار، چاپ مجله‌ی خواندنی‌ها، تهران.
- آذری و واقف ماده‌سی، اسلام انسیکلوپدیاسی، آنکارا.
- الاخا- قارداشلیق مجله‌سی، بغداد، ۱۹۶۸.
- آذربایجان مجله‌سی، واقفه مخصوص نمره‌لری ۱۹۶۹ – ۱۹۶۷ – سینیجی ایللر.
- ادبیات و اینجه صنعت هفته‌لیک قازه‌تی، واقفه حصر ائدیلیمیش نمره‌لری ۶۹ – ۱۹۶۷.

- ادبیات درس لیکلری، باکی چاپی.
- نسیمی نین دیوانی، الیازما تبریز ملی کتابخانا.
- شاه اسماعیل ختایی نین دیوانی، باکی چاپی.
- فضولی نین دیوانی، باکی چاپی.
- ودادی نین دیوانی، باکی چاپی.
- ذاکرین دیوانی، باکی چاپی.
- تۆرک ساز شاعرلری، آنکارا، ۱۹۵۲.
- نباتی نین دیوانی، تبریز، تهران، باکی.
- آذربایجانین شفاهی خلق ادبیاتی، ۱۹۷۰، باکی.
- اسکی تۆرک ادبیاتیندا نثر، استانبول، ۱۹۶۴.
- اؤرنکلی ادبیات و کومپوزیسیون بیلگیلری، ۱۹۶۴، آنکارا.
- شرقیات مجموعه سی استانبول اونیورسیتته سی، شرق شناس لبق فاکولته سی.
- آذربایجان شفاهی خلق ادبیاتینا دائر تدقیقلر، ج ۳، باکی، ۱۹۶۸.
- تورک دیلی و ادبیاتی مجله سی، استانبول اونیورسیتته سی.
- آذربایجان علملر آکادمیاسی نین خبرلری مجله سی، دیل و ادبیات سرییاسی، باکی.
- Azerbaijanian Poetry, an anthology, M. ۱۹۶۹.

ح. م. صدیق

تبریز - ۱۳۴۷

KİTAB BİLGİLƏRİ

- Kitabın adı: **Gözəllik və Həqiqət Şairi Vaqif**
- Farsça Yazanı: **Prof. Dr. Hüseyin Düzgün**
(Hossein Mohammadzade sadigh)
- Türkçəyə çevirən: Mohəmməd Davəryar
- Tayp ve Dizayn: Muəssise Daniş Səhənd ve Savalan,
Tehran,
Tel: ۰۰۹۸-۲۱ – ۶۶۷۲۵۵۵۹
- Yayınlayan: Təkdərəxt
- Tel: ۰۰۹۸-۲۱-۶۶۷۲۷۵۵۰ / ۰۹۱۲۷۰۴۵۹۱۳
- Basılış Yeri: Tehran –۲۰۱۰
- Birinci Nəşr
- İSBN: ۹۷۸-۶۰۰-۵۵۵۹-۳۳-۰

VĀQİF

Gözəllik və Həqiqət

ŞĀİRİ

Farsça yazan:
Prof. Dr. Hüseyin Düzgün
(Hosein Mohammadzade sadigh)

Türkçeyə çevirən:
Məhəmməd Dəvəryār Ərdəbili

Tehran